

BUBU YAYI DISONUKU

YAYI ME LUNGA

 Beno bikala ya kutelama, kana beno me zola, na ntangu beto ke kulumusa bayintu ya beto samu na kusambilala.

² Tata ya Mazulu ya luzolo, beto ke vutula matondo na nkokila yayi samu na ntangu yayi yankaka, ya kukwisa mpe katalisa Nsangu yayi ya mbote ya nkembo, ya kitoko mingi ya Yesu Klisto. Beto ke tonda Nge samu ti Yandi kele kaka mutindu mosi mazono, bubu yayi, mpe kukonda nsuka. Beto ke tonda Nge samu na bantu yayi me vukana awa na nsungi yayi ya madidi, mpe yina kele diaka na kuvingga mambu ya nene, ba ke na kutalaka, ba ke kwikila ti Nzambi ke pesa beto kima mosi ya nene mingi. Beto me kwisa na kivuvu yina, Mfumu, samu na balukutakanu nionso. Beto ke tonda Nge samu na balukutakanu, ya mazusi na nkokila, na tabernacle; beto ke tonda Nge samu na lukutakanu ya mazono na nkokila, mpe samu na lukutakanu ya bubu yayi, na tabernacle. Beto ke vingila ntangu yayi yina Nge ke sala samu na beto na nkokila yayi.

³ Tata, beto zaba ti konso muntu yina lenda ningisa maboko ya bawu lendaka balula matiti ya Biblia, kasi ya kele kaka na Mosi Yina lenda pesa Yawu moyo mpe kukumisa Yawu ya kieleka, mpe ya kele Nge. Mpe, Tata, beto ke vingila ti Nge sala yawu na nkokila yayi. Sakumuna beto na mutindu nionso. Bantima ya beto me fuluka na kiese mingi mutindu beto ke mona ntangu me belema ntangu beto ke kutana na Yandi, mbunzu na mbunzu, Yandi yina beto me zolaka mpe beto me zinga bamvula nionso yayi.

⁴ Bantu mingi ya malu-malu, Mfumu, me balula ntima. Na mutindu mu me bakula nkonga ya nene, makumi yiya to makumi tanu, ke baka mbotika na Nkumbu ya Nge, na suka yayi, kubanda lukutakanu ya mazono na nkokila. O Nzambi, pardo landila, beto ke sambila, tii kuna konso Nkuna ya Nzambi yina ba zabaka na ntwala ke mona Nsemo ya Nsangu ya mbote, mpe ke kota na dikabu.

⁵ Beto ke lomba Nge na kubumba beto na nkokila yayi na manima ya Ndinga; fwa meso ya beto na bima ya yinza, mpe bika beto mona Yesu. Bika ti kimbangi ya Mongo ya Nsobolo kuvwanda na kati ya beto, na nkokila yayi, samu beto mona muntu mosi ve kasi Yesu kaka. Beto me lomba yawu na Nkumbu ya Yandi, mpe samu na nkembo ya Yandi mpe mutindu nsiamisa ya Nsangu ya Yandi ya mbote. Amen.

Beno lenda vwanda.

⁶ Mu ke balula micro yayi, to mesa yayi, mwa fioti na lweka, kana ya ke vwanda mbote mingi, na mutindu ti mu lendaka mona na balweka nionso zole ya bantu. Mu banza ti mu lendaka vutula ba-microphone yayi na kisika ya yawu awa. Mbote mingi, na mwa ntangu fioti.

⁷ Beto ke pesa mbote, kubanda ntete-ntete na kivinga yayi awa na nkokila yayi, bankundi ya beto na Arizona, Californie, Texas, mpe bisika nionso na Etats-Unis, na nzila ya allo-allo. Yayi, yayi ke kwenda na yinsi ya muvimbba, lukutakanu ya nkokila yayi, na nzila ya allo-allo, na yina beto ke tula kivuvu ti Nzambi ke sakumuna beto.

⁸ Beno ke kuwa mbote, kuna na manima na kivinga ya diboko ya kimama? Mbote mingi, ba ke tala singa ya allo-allo, samu na kutala kana ya ke sala mbote.

⁹ Bantu nionso ke na kiese na nkokila yayi? [Dibuundu me tuba, "Amen."—Mu.] Beno tuba, yayi ke kitoko mingi! Na lweka yayi? ["Amen."] Amen. Mu ke na kiese mingi na kumona ti beno nionso me vwanda na bisika ya mbote.

¹⁰ Mpe ntangu yayi mbasi na nkokila, kana nkonga ya bantu kukuma mingi, ya ke vwanda diaka na lukutakanu na nzila ya allo-allo. Ya ke salama dezia na nkokila yayi. Mu banza ti bayankaka kele kuna na tabernacle.

¹¹ Mpe, mbasi na suka, balukutakanu ke vwanda ve na tabernacle, samu...ya ke vwanda na muntu yina ke tekisaka bafololo kuna samu na kuyidika yinzo-Nzambi samu na makwela mbasi na manima ya midi. Mpe ba me nata balukutakanu, ya suka, kuna na yinzo-Nzambi ya Mpangi Ruddell, mosi ya ba-associé ya beto, mpe na bala-bala yayi awa, 62. Ba zabisaka yawu? [Mpangi Neville me tuba, "Yinga."—Mu.] Ba zabisaka yawu. Mpe, kana ya ke na bisika mingi ve kuna, beto ke baka bayina me bikala mpe beto ke tinda mulongi yankaka na sika ya Mpangi Junior Jackson, kuna na Clarksville. Beto me sala yawu na sika ya Mpangi Ruddell, samu ya ke pene-pene awa, mpe beto lenda... mpe beto banzaka ti beno lendaka mona kisika yango kukondwa mpasi. Na yina beto ke yidika kima mosi na mutindu mosi to yankaka. Mpe ya kieleka na bambotika ya mbasi, mpe mu ke na kivuvu ti ya ke vwanda na nkama mosi to zole yina ba ke yika na mbotika ya mbasi. Mpe ntangu yayi mbasi na nkokila...

¹² Mu ke zolaka ata fioti ve kuzabisa na ntwala yintu ya dilongi, kasi na lukutakanu ya nkokila mosi, to kilumbu mosi, mu zola tubila dilongi yayi: *Nani Kele Melkisédek Yayi?* Samu, ya ke dilongi yina mu banza ti beto ke na kuzinga na ntangu ya baluzayikisu yayi, mpe ya kele kiuvu yina ba ke yufulaka na bansungi nionso, ya, "Nani kele Muntu yayi?" Mpe mu ke kwikila ti Nzambi kele na mvutu, Nani Yandi vwandaka.

Bayankaka tubaka, "bunganga-Nzambi," bayankaka tubaka, "ntinu," bayankaka... Kasi ya fwana...

¹³ Ntangu nyonso yina kiuvu kele, ya fwana vwanda na mvutu na kiuvu yina, mvutu ya mbote. Ya lendaka vwanda ve na kiuvu mosi kukondwa ntete ya vwanda na mvutu mosi.

¹⁴ Ntangu yayi, beto ke tula kivuvu ti Nzambi ke pesa beto lusakumunu na nkokila yayi na nzila ya Ndinga ya Yandi, mutindu beto ke tanga Yawu.

¹⁵ Mpe beno fwana... Billy me tuba na munu na kutuba na beno ti beno vwandaka na ngwisani ya mbote na bantu awa yina vwandaka tula batomabilu na parking, bapulusu mpe nionso. Beno landila kaka mutindu yina; ya kele mbote mingi, mingi.

¹⁶ Beto ke na kivuvu na kumona ntangu yango, ntangu yankaka pene-pene ya ntangu ke kwisa na ntwala, ntangu mbala yankaka beto lendaka nata tenta awa na mbanza mpe kutula yawu kuna na stade ya base-ball, kisika beto lenda vwanda kuna mwa bantangu, ntangu yankaka basabala tatu to yiya, ya reveil, ntangu nionso. Mpe awa beto me zabana mosi na yankaka ntama mingi ve, na yina beto fwana kupesana mbote mpe kukwenda diaka. Kasi mu ke zola kukwisa mpe kusala nzietolo yina mu ke vwandaka ntangu ya yinda, ntangu yina beno lendaka vwanda na mutindu ti beto ke sukisa ve na nkokila mosi to zole, kasi kuvwanda kaka mpe kulonga, na mwini mpe na nkokila, na mwini mpe na nkokila, ntangu nionso. Ntangu yankaka muntu mosi ke vutuka na yinzo samu na kudikisa bansusu, samu na kubasisa midiki na bangombe, mpe ke kwisa vutuka na sabala ke kwisa mpe yandi ke landila lukutakanu. Mu—mu ke zolaka mutindu yina. Na yawu Mfumu kuvwanda na beno.

¹⁷ Ntangu yayi, na ntwala mu kwenda, ntangu yankaka na Lumingu na suka to na Lumingu na nkokila, to na ntangu mosi, na mosi ya balukutakanu yayi, mu zaba ti beno nionso ke vingila na kuwa Nsangu na zulu ya Kieleka samu na yina me tala *Makwela Mpe Kufwa Makwela*, yina kele mosi ya mambu ya nene ya kilumbu yayi. Mpe mu ke na kivuvu kaka mutindu mu me telama awa, mu ke kwikila ti mvutu ya kieleka kele na kati ya Ndinga ya Nzambi, mpe mu ke kwikila ti ya ke samu na yawu mu silaka kukwisa kuvutuka.

¹⁸ Mpe mu banza, na luzabu ya munu, na mutindu mu me zaba, mu zola sala lukutakanu yankaka awa na Jeffersonville, na Lumingu ya Paki, mpe beto ke... samu na lukutakanu ya kubasika ya mwini, na manima yina ya Lumingu ya Paki. Na yawu beto ke zabisa yawu na ntwala mpe beto ke meka ntangu yankaka na kuzwa kivinga mosi, kana ya lendaka salama, to kisika mosi, samu na Lumingu, ntangu yankaka beto ke vutuka na Kilumbu ya sambanu mpe na Lumingu. Mu fwana sala nzietelo na avion kukwenda mpe kuvutuka, samu ya ke pene-pene ya ntangu... Mu fwana zikisa yawu, ntete, na manaka yina

mu ke na yawu, mpe mosi ya manaka ya banzietolo ya munu—munu—munu na Californie. Na yina, na mbala mosi na manima ya yina, mu fwana kwenda na—na Afrique. Na yawu beno simba yawu mpe beno sambila samu na beto.

¹⁹ Ntangu yayi, na nkokila yayi, mu zola benda bukebi ya beno na kitini ya Ndinga ya Nzambi, yina me bakama na kapu 4 ya Santu Luc. Kapu 4 mpe nzila ya 16, ya ke banda, Yesu ke na kutuba.

... *Bubu yayi Ndinga me lunga na makutu ya beno.*

²⁰ Ntangu yayi beto zola tendula, kubanda na Yayi, samu na kukangisa dibuki ya mutindu Ndinga ya Nzambi kele ngolo! Ntangu yayi, beto nionso lenda bakula bisengo, kasi ya ke lomba Ngolo samu Yawu kusala.

²¹ Beto lenda bakula bisengo ya masini mosi, ya tomabilu, kasi ya ke lomba ngolo samu na kubalula ba-piné mpe kutambwisa yawu.

²² Ntangu yayi, Yesu yutukaka na—na Nazareth, kisika ba sansaka Yandi. Kuna na kati ya Masonuku awa, beto ke mona ti ba vwandaka tuba, “Beto kuwaka ti Nge salaka kima *kingandi* kuna na Capernaüm. Ntangu yayi beto zola mona Nge kusala yawu na kati ya yinsi ya Nge Mosi.”

²³ Yesu tubaka, “Ba ke zitisaka ve profete na banza ya yandi.” Mpe, samu, ya ke kisika yina ba me sansa beno, mpe kisika bantu me zaba beno. Mpe kuna Yandi vwandaka na nkumbu ya yimbi, na kubanda, samu Yandi butukaka kukondwa tata ya yinsi ntoto. Ba vwandaka bokila Yandi “mwana ya makangu,” ti Marie kuzwaka kivumu na ntwala yandi kwelana, na meso ya bantu, na Joseph. Kasi, ya ke mutindu yina ve, beto zaba ti ya ke mutindu yina ve.

²⁴ Mpe na Disonuku yayi, yina me sala ti meso ya munu kubwa na zulu ya yayi, ya vwandaka kima yina me salama ntama mungi ve na Phoenix, Arizona. Ya vwandaka kilumbu ya nsuka, ya lukutakanu yina mu zolaka tuba na Lukutakanu ya Bayinsi nionso ya Bantu ya Mumbongo ya Nsangu ya mbote ya Muvimba.

²⁵ Mpe na lukutakanu yayi ya vwandaka na nzenza mosi na beto, yina vwandaka évêque ya Catholique, yina kele—kele ba “Rites Chaldéen ya Dibuundu ya Catholique; Révérend ya Lukumu John S. Stanley, O.S.D.” Yandi kele “archevêque métropolitain ya Etats-unis,” na dibiundu ya Catholique. *Yayi* lendaka vwanda kalati ya yandi mpe kisika yandi—yandi ke vwandaka.

²⁶ Mpe yandi vwandaka nzenza na kati ya Bantu ya Mumbongo ya Baklisto, mpe mu me mona yandi kuna, kilumbu mosi na ntwala. Mpe ntangu mu vwandaka tuba na Kilumbu ya sambanu na nkokila, to na Kilumbu ya sambanu na suka na madia ya suka, mpe mu... Mutindu mu vwandaka tuba, yandi vwandaka tala

munu kaka. Mu banzaka, "Bakala yina kieleka ke na kuwisana ve na mambu nionso mu ke tuba." Mpe, beno zaba, beno lendaka—beno lendaka mona yandi; yandi vwandaka matisa yintu mpe kukulumusa yawu, kasi mu vwandaka zaba ve yina vwandaka kusimba yandi.

²⁷ Na yawu na Lumingu na manima ya midi, ntangu mu mataka samu na kutuba, mu bakaka dilongi ya munu na zulu ya *Bampasi Ya Kubuta*, kisika Yesu tubaka, ti, "Mutindu kento ke na kubuta," yandi ke na mpasi ya kubuta. Mpe na yawu mu zolaka sadila yawu, mutindu, *Bampasi Ya Kubuta*, dilongi, na kutubaka ti yinza ke na bampasi ya kubuta ntangu yayi. Yina ya ntama fwana kuzimbana, na yawu yina ya malu-malu ke butuka; kaka mutindu nkuna fwana kupola, samu na kubasisa luzingu ya malu-malu.

²⁸ Mpe wapi mutindu bampasi, bampasi ya kubuta me bula yinza! Na Mvita ya Ntete ya Yinza ya muvimba, ya vwandaka na mpasi ya nene, samu ya vwandaka na gaz toxique, mpe nionso yina, yina lendaka bebisa yinza. Mpe na Mvita ya Zole ya Yinza ya muvimba, yandi kuzwaka mpasi yankaka, mpasi ya kulutila nene; ya vwandaka na ba-bombe ya masasi ya nene, mpe na bombe atomique diaka. Yandi lendaka kanga ntima ve na mpasi yankaka ya kubuta. Na minduki yayi mpe bima yayi bubu yayi, mvita mosi yankaka ke lemuso yandi na mupepe, samu yandi ke buta ntangu yayi. Mpe ya ke vwanda na ntoto yankaka ya malu-malu. Biblia me tuba ti ya ke vwanda.

²⁹ Na nsi ya Nsangu ya profete nionso, Israel ke kuzwa mpasi ya kubuta, samu ti baprofete yayi vwandaka kota na kisalu na manima ya ba-théologien mpe banganga-Nzambi me kotisa dibuundu na ba-organisation ya mutindu nionso. Mpe ntangu baprofete yina vwandaka kota na kisalu na MUTINDU ME TÚBA MFUMU, ba vwandaka ningisa mabuundu yina, mpe yandi vwandaka na mpasi ya kubuta. Na nsuka, yandi vwandaka na bampasi ya kubuta tii kuna yandi me buta Mwana ya Nsangu ya mbote, yina vwandaka Ndinga Yawu mosi me kuma nzutu.

³⁰ Na yawu kieleka dibuundu kele diaka, na bampasi ya kubuta na nkokila yayi, samu na kubuta Mwana, Mwana ya Nzambi yina ke kwisa vutuka. Ba-théologien ya beto nionso, ba-systeme ya beto nionso, ba-denomination ya beto nionso, me kupola na nsi ya beto. Na yawu beto ke na mpasi ya kubuta, mpe Nsangu mosi me katuka na Nzambi ke pesa ntangu nionso na dibuundu mpasi ya nene, kasi na manima ya mwa ntangu fioti yandi ke buta Kento ya makwela. Yawu yina ke nata Yesu Klisto na Kento ya Yandi ya makwela.

³¹ Mpe, na yina, mu vwandaka banza ti muntu yayi vwandaka mingi kuwisana na munu ve. Ntangu mu telamaka samu na kulonga Nsangu yayi, mu zibulaka Biblia, samu na kumona dititi.

³² Mpe kento ya munu pesaka munu Biblia ya malu-malu, samu na Noël. Biblia ya munu ya ntama me sala bamvula pene ya kumi na tanu, mpe ya vwandaka kaka ya kilambu. Matiti ya yawu, vwandaka katuka, ntangu nionso mu vwandaka zibula yawu. Mpe, kasi mu me zaba kaka kisika mu lendaka mona Masonuku nionso, na yawu mu longukaka na bukebi nionso na kati ya Biblia. Mpe mu bakaka kaka yina ya malu-malu, samu yina yankaka vwandaka monana ya kubeba, samu na kukwenda na yawu na yinzo-Nzambi.

³³ Mpe ntangu mu bandaka na kuzibula na Santu Jean, kisika Masonuku vwandaka, mu bandaka na kutanga kapu 16, mpe nzila yina mu vwandaka sosa vwandaka kuna ve. Na yawu mu banzaka, “Ya ke yitukisa!” Mu zibulaka diaka; ya vwandaka kaka ve.

³⁴ Mpe Mpangi Jack Moore, ya Shreveport, Louisiane, nkundi ya munu ya kieleka, yandi vwandaka kuna. Mu tubaka, “Mpangi Jack, ya kele ve na Santu Jean 16?”

Yandi tubaka, “Yinga.”

³⁵ Mpe nganga-Nzambi yayi telamaka na kiti ya yandi, na kati ya banganga-Nzambi pene ya nkama mosi ya kuvwanda na estrade; yandi kwisaka pene-pene ya munu, na ba-mvwela ya yandi nionso mpe ba-robe na bakulunsi, mpe nionso yina, mpe yandi kwisaka pene-pene ya munu. Mpe yandi tubaka, “Mwana ya munu, vwanda swi. Nzambi ke zola kusala kima mosi.”

Mu banzaka, “Evêque ya Catholique kutuba na munu mutindu yina?”

Yandi tubaka, “Tanga yawu na Buku ya munu.”

³⁶ Mpe mu tangaka Masonuku ya Buku ya yandi, mpe mu bakaka masonuku ya munu mpe mu kwendaka na ntwala, mu longaka dilongi ya munu.

³⁷ Na manima, ntangu mu manisaka, yandi telamaka na manima mu vwandaka me kwenda, mpe tubaka, “Ya ke na kima mosi ke salama. Na manima ya yina, dibuundu fwana basika na kati ya mvindu yina yawu kele, to beto fwana basika na kati ya mvindu yina dibuundu kele.” Na yawu, mosi to yankaka.

³⁸ Mpe mu vwandaka na nzila samu na kuvutuka, kuna na Tucson, na nkokila yina. Bana vwandaka kudila samu na sandwich, mpe telamaka na kiosque mosi samu na kusumba sandwich. Mpe kento ya munu tubaka, “Bill, mu me vwandaka ata fioti ve na kidi-kidi na luzingu ya munu nionso, na kumona nge ya kutelama kuna na kusosaka na kati ya Biblia.” Yandi tubaka, “Yina kotisaka nge na kidi-kidi ve?”

³⁹ Mu tubaka, “Ve.” Mu tubaka, “Mu zabaka ti ya vwandaka kisika mosi kuna. Dititi yina vwandaka na kati kuna ve. Ya ke kifu ba babasisaka yawu na mukanda.”

⁴⁰ Mpe yandi tubaka, “Kubanza, ti ya ke munu muntu pesaka nge Biblia yina! Ya monanaka ti meso nionso na kati kuna vwandaka na zulu ya munu.”

⁴¹ Mpe mu tubaka, “Mbote, ya vwandaka foti ya nge ve. Yina vwandaka foti ntangu ba basisaka Biblia na masini.” Mu tubaka, “Ba tulaka ata fioti ve dititi yina kuna na kati.”

⁴² Mbote, mu bakaka yawu mpe mu talaka yawu diaka, ya vwandaka ya kulunga na mutindu ya lendaka vwanda; kasi kapu ya 16 ke suka, kitini, kitini ya yawu ke suka pene ya ba-centimetre sambwadi kubanda na nsi, yankaka na kapu 17 na lweka yina yankaka, ke sala kima mutindu mosi. Mpe, mutindu ya vwandaka Biblia ya malu-malu, matiti yina zole vwandaka ya kukangama kintwadi na mutindu ya kulunga, mpe mu vwandaka tanga na kapu 17 na kisika kutanga kapu 16. “Mbote,” mu tubaka, “yina ke mbote mingi. Ya ke samu na kima mosi.”

⁴³ Mpe kaka mutindu beno lendaka kuwa konso ndinga yina, Ndinga mosi kwisaka na munu, mpe tubaka, “Yandi kwendaka na Nazareth, na kisika yina ba sansaka Yandi; mpe kotaka na synagogue, mutindu ya vwandaka mumesanu ya Yandi. Mpe nganga-Nzambi pesaka Yandi Masonuku samu na kutanga, mpe Yandi tangaka Esaie 61. Mpe ntangu Yandi tangaka Masonuku, Yandi vwandaka; Yandi vutulaka Biblia na nganga-Nzambi, Buku, mpe Yandi vwandaka. Mpe dibuundi ya muvimba vwandaka kutala Yandi. Mpe Bandinga ya ntalu basikaka na yinwa ya Yandi. Mpe Yandi tubaka, ‘Bubu yayi Disonuku yayi me lunga.’”

“Bubu yayi Disonuku yayi me lunga.”

⁴⁴ Wapi mutindu Masonuku kele ya kieleka! Kana beno tala na Esaie 61:1 tii na 2, ya ke kisika yina Mfumu ya beto vwandaka tanga, Esaie 61:1 tii na 2. Kasi na kati-kati ya nzila ya 2 ya Esaie, Yandi telamaka. Kisika ya me tuba, “Mpeve ya Mfumu kele na Munu; samu na kuzabisa mvula yina ya lemvo,” na yina Yandi manisaka na kutanga. Samu na yinki? Kitini yina yankaka, samu na kunata lusambusu, vwandaka ve samu na nkwizulu ya Yandi ya ntete, kasi na nkwizulu ya Yandi ya Zole. Beno me mona, ya salamaka ve kuna. Wapi mutindu Masonuku ke salaka kifu ata fioti ve! Ya ke vwandaka ntangu nionso ya kulunga. Yesu manisaka na kutanga kisika yina Masonuku sukaka, samu yina vwandaka kieleka yina lendaka salama na kilumbu ya Yandi, ntangu yayi, na nkwizulu yina ya ntete. Na Nkwizulu ya zole Yandi ke nata lusambusu na zulu ya ntoto; kasi na ntangu yina ve. Yandi vwandaka “samu na kuzabisa mvula yina ya lemvo.”

⁴⁵ Beno tala Mesiya vwandaka ya kutelama na zulu ya estrade, samu na kukitalisa Yandi mosi na Ndinga ya nsilulu samu na nsungi yina. Ya ke yitukisa, Mesiya vwandaka ya kutelama na ntwala ya dibuundi! Mpe beno tala Bandinga yayi ya ntalu,

ntangu Yandi me tuba awa, “Samu na kuzabisa mvula yina ya lemvo.”

⁴⁶ “Mvula yina ya lemvo,” mutindu beto nionso me zaba, mutindu mitangi ya Biblia, vwandaka “mvula ya mukembu.” Ya ke, ntangu bampika nionso na bantu ya boloko nionso, mutindu ba vwandaka, bayina ba tulaka, na boloko; mpe ba lendaka pesa mwana mosi ya bakala, samu na kufuta mfuka; to mwana ya kento, samu na kufuta mfuka, [Kisika ya mpamba na bande—Mu.] mpe ba vwandaka na kimpika. Ya vwanda konso ntangu yina ba me vwanda na kimpika, to bantangu yikwa ba lendaka vwanda kuna; ntangu mvula ya mukembu, lungaka, ntangu ba bulaka mpungi, mutu nionso lendaka kuma na kimpwanza kana yandi me zola kuvwanda na kimpwanza. [Kisika ya mpamba na bande.] Beno me kuma na kimpwanza. Beno ke vwanda diaka mpika ve.

⁴⁷ Kasi kana beno zola bikala mpika, na yina ba ke nata beno kuna na tempelo, pene-pene ya dikunzi ya tempelo, mpe ba vwandaka baka mutunga mpe ba ke tobula dikutu ya beno, na yina beno ke sadila mfumu yina ya bampika tii na nsuka ya bilumbu ya beno.

⁴⁸ Yinki mbandu ya kulunga ya kele samu na Nsangu ya mbote ya Yesu Klisto! Ntangu ba me longa Yawu, ntangu ya lemvo, mpe ntangu ya mukembu; mutu nionso, beno vwanda nani, beno vwanda ya konso ntinta yina, beno vwanda ya konso denomination yina, wapi mutindu beno me dinda na disumu, to ya vwanda konso kima yina ke tambula mbote ve na beno; beno lenda kuma na kimpwanza ntangu beno me kuwa mpungi ya Nsangu ya mbote ke bula. Beno ke kuma na kimpwanza!

⁴⁹ Kasi kana beno pesa mukongo na Nsangu mpe beno manga na kuwa Yawu, beno tala, ba ke tobula dikutu ya beno, na mutunga. Na nzonzolo yankaka, ya zola kutuba, ti beno me luta ndilu yina ya kati-kati ya lemvo na lusambusu, mpe beno ke kuwa ata fioti diaka ve Nsangu ya mbote. Beno ke kwenda ntama ata fioti ve. Beno fwana vwanda mpika na kati ya systeme yina, tii na nsuka ya bilumbu ya beno, kana beno manga na kuwa mvula ya lemvo.

⁵⁰ Ntangu yayi, kitini ya yawu yankaka, mutindu mu me tuba, vwandaka na nsatu ya kuvutula mvutu na yawu ve, samu nkwizulu yayi ya Mesiya, yina fwana kwisa ntangu yayi, kele ntangu Yandi ke nata lusambusu.

⁵¹ Ntangu yayi, wapi mutindu bantu yina lembanaka na kumona Nani Yandi vwandaka? Wapi mutindu bawu kondwaka na kumona yawu? Wapi mutindu ya lendaka salama, na ntangu ya siamisamaka mpe talisamaka pwelele? Wapi mutindu bawu lendaka kumona yawu ve? Ntangu Yandi . . .

⁵² Yinki Ndinga yayi! Beno banza yawu, “Bubu yayi Disonuku yayi me lunga na ntwala ya meso ya beno.” Nani tubaka yawu?

Nzambi Yandi mosi, Yina kele mutendudi ya Ndinga ya Yandi Mosi. "Bubu yayi Disonuku yayi me lunga." Mesiya, Yandi mosi, vwandaka ya kutelama na ntwala ya dibuundu mpe vwandaka tanga Ndinga ya Biblia, yina vwandaka tubila Yandi mosi, na manima yina vwandaka tuba, "Bubu yayi Disonuku yayi me lunga," mpe bawu lembanaka na kumona Yawu.

⁵³ Yinki diambu yayi ya kiadi ya lendaka vwanda, kasi ya salamaka. Ya salamaka na bambala mingi. Wapi mutindu yawu salamaka? Ya kieleka, mutindu ya salaka yawu na bantangu yankaka, na kundimaka ntendulu ya Ndinga ya muntu. Ya vwandaka samu na yawu. Bakwikidi ya bilumbu yina, bakwikidi ya kati-kati, vwandaka baka ntendulu ya yina nganga-Nzambi tubaka samu na Masonuku. Na yina Yesu, mutindu Yandi vwandaka ve na mosi ya bandonga ya bawu to bimvuka ya bawu, ba basisaka Yandi na kompani ya bawu.

⁵⁴ Mpe, na yina, ba lendaka fwanikisa Yandi na bawu ve, samu Yandi vwandaka ya kuswaswana na bawu. Muntu yayi Yesu Klisto vwandaka Yandi mosi na mutindu ti muntu mosi ve lendaka lembana na kumona ti ya vwandaka Mwana ya Nzambi, samu Yandi vwandaka kutalisama ya kulunga ya Masonuku yina ba sonikaka samu na Yandi.

⁵⁵ Ya ke mutindu yina Muklisto nionso me zabana, ntangu luzingu ya yandi me talisa bima yina Muklisto fwana sala.

⁵⁶ Wapi mutindu Yandi lendaka telama kuna mpe kutuba, "Bubu yayi Disonuku yayi me lunga na ntwala ya meso ya beno!" Ya ke mbote mingi, ya ke monana mbote-mbote, kasi bantu lendaka mona yawu ve. Samu na yinki? Ya ke samu bawu bakaka ntendulu ya kimvuka mosi ya banganga-Nzambi yina ba vwandaka kuwa.

⁵⁷ Mpe masolo ke vutukaka ntangu nionso. Mpe Masonuku ke vwandaka na ntendulu kulutila mosi na Yawu, mpe baluzayikisu kulutila mosi.

⁵⁸ Mumbandu, mutindu ya me tuba na Biblia, ti, "Mu me bokila mwana ya munu, na nganda ya Egypte," na kutubilaka Yesu. Beno tala masonama ya nsi ya buku kuna, mpe beno ke mona, ya ke tubila diaka Jacob, Disonuku yina mosi. Yesu vwandaka Mwana ya Yandi ya mbuta. Jacob vwandaka mwana ya Yandi yina Yandi bokilaka na nganda ya Egypte, yina Scofield ke na kutubila mpe masonama yankaka nionso ke pesa na yawu, samu ya ke Disonuku yina ya vwandaka tubila. Na yawu ya vwandaka na bamvutu zole; ya vwandaka tubila Jacob yina ba bokilaka na kubasika, mpe Yesu yina ba bokilaka na kubasika.

⁵⁹ Mpe ya ke mutindu yina bubu yayi! Yawu yina beto ke na mubulu mutindu beto ke na yawu, mpe bantu lembanaka na kumona Kieleka ya Ndinga, ya ke samu ya ke na bantendulu mingi ya bantu na Ndinga ya Nzambi. Nzambi ke na mfunu ya

muntu mosi ve samu na kutendula Ndinga ya Yandi. Yandi kele mutendudi ya Yandi Mosi.

⁶⁰ Nzambi tubaka, na mbandukulu, “Bika nsemo kuvwanda,” mpe nsemo vwandaka. Ya ke na nsatu ya ntendulu ve.

⁶¹ Yandi tubaka, “Mwense mosi ke kuzwa kivumu,” mpe yandi kuzwaka yawu. Ya ke na nsatu ya ntendulu mosi ve.

⁶² Ntangu... Ntendulu ya Nzambi samu na Ndinga ya Yandi kele ntangu Yandi ke lungisa mpe ke siamisa ti Yawu kele mutindu yina. Ya ke ntendulu ya Yandi, na kusalaka ti yawu kusalama. Ya ke kisika yina ntendulu ya Nzambi kele, ya ke ntangu Yandi ke sala ti Ndinga ya Yandi kusalama. Yandi ke na kutendula Yawu na beno.

⁶³ Ya ke mutindu kana ya vwandaka ata fioti ve na nsemo, mpe Yandi kutuba, “bika ti nsemo kuvwanda,” mpe yawu vwandaka, ya ke na nsatu ya muntu ve samu na kutendula yawu.

⁶⁴ Kasi beto me vukisa na Yawu ba-systeme ya bantu, mpe, ntangu beno ke sala mutindu yina, beno—beno ke basisa Yawu na nzila. Ya ke vwandaka ntangu nionso mutindu yina.

⁶⁵ Kasi mu ke banzaka ntangu nionso mutindu ya fwanaka monana pwelele. Beno banza yawu, Mesiya! Samu na yinki bawu lembanaka na kumona Yandi? Samu, bantwadisi ya bawu yina zolaka mona Yandi, yina zolaka zaba Masonuku mbote-mbote, yina zolaka vwanda na luzabu ya Masonuku, bawu monaka Muntu yayi mfunu ve mpe bawu tubaka, “Yandi kele mwana ya makangu, na—na kubanda. Beto lendaka kwikila Yawu ve.”

⁶⁶ Na bamvula ke kwisa na ntwala, beto ke kwikila yawu ve. Beto ke kufwa na lukanu ya kutuba ti Yandi vwandaka Mwana yina me butuka na mwense.

⁶⁷ Mpe kilumbu mosi ya ke salama ti, bima yina beto ke mona Yehowa ke sala bubu yayi, bantu na bansungi yina ke kwisa, kana ya ke vwanda, ke kufwa samu na kima yina beto ke na kutubila bubu yayi. Beno ke sala yawu ntangu kidimbu ya niama ke kwisa, mpe ba ke pesa beno muswa ya kulonga Nsangu ya mbote mutindu yayi ve. Ntangu kimvuka ya nene ya mabuundu ke vukana kintwadi, yina ba ke na kuyidika na ntangu yayi samu na dibuundu ya yinza, beno ke kanga kimbangi ya beno na luzingu ya beno mosi, na Yayi.

⁶⁸ Beno fwana kwikila Yawu ntangu yayi. Kana banganga-Nzambi yina lendaka vumbuka na lufwa, yina fundisaka Yandi, ba ke fundisa Yandi ve. “Kasi,” beno ke tuba, “kana mu vwandaka kuna, mu zolaka sala kima *kingandi*.” Mbote, yina vwandaka nsungi ya beno ve. Kasi, yayi kele nsungi ya beno, yayi kele ntangu ya beno.

Beno ke tuba, “Mbote, kana Yandi vwandaka awa!”

⁶⁹ Biblia me tuba, “Yandi kele mutindu mosi mazono, bubu yayi, mpe kukonda nsuka,” mutindu mosi, Yandi ke mutindu

yina awa. Kasi, Yandi kele awa. Mutindu yinza me temuka, ya me kuma na mfunu mingi, mpe ya kuma ya kulonguka mingi; Yandi kele awa na mutindu ya Mpeve, yina ba lendaka kufwa to kunata lufwa ve. Yandi kufwaka mbala mosi; Yandi lenda kufwa diaka ve. Yandi lendaka kuma nzutu samu Nzambi kufwa na kati ya nzutu, samu na disumu. Kasi na mbala yayi Yandi lendaka kufwa ata fioti ve; Ya kele Mpeve-Santu.

⁷⁰ Ntangu yayi, wapi mutindu kubanza ti ba vwandaka telemina Yandi samu na mambu yina! Kima yankaka, yina Yandi zolaka ve kukota na bimvuka ya bawu. Na yina, beno me mona, yina vwandaka sala Yandi muntu ya yimbi. Yandi zolaka ve kukota na ba-organisation ya bawu—ya bawu, Yandi zolaka kukota na bunganga-Nzambi ya bawu, mpe Yandi zolaka kuvwanda na kima ya kusala na yawu ve. Na yina, na nganda ya nionso yina, Yandimekaka na kupanza yina bawu tungaka.

⁷¹ Yandi kotaka na tempelo. Beto ke tubaka ti Yandi vwandaka Muntu mosi ya lembami; Yandi vwandaka mutindu yina, kasi na bambala mingi beto ke bakulaka ve yina lembami kele.

⁷² Yandi vwandaka Muntu yina vwandaka kabula mpasi, kasi ntete beto ke kondwaka kubakula yina kukabula mpasi kele. Mawa ya bumuntu ve, ya ke kukabula mpasi ve. Kasi, *kukabula mpasi* kele “kusala luzolo ya Nzambi.”

⁷³ Yandi lutaka na kiziba ya—ya Bethesda, na mwelo. Ya vwandaka na bantu ya kulala kuna, bankonga ya bantu mingi. Bankonga ya bantu kele ntalu yina me zabana ve. Kasi bankonga ya bantu vwandaka ya kulala kuna; bikata, bampofo, bankonzo, bantu yina vwandaka ningana ve. Mpe Yandi kabulaka mpasi na bantu, ntangu nionso. Mpe Yandi kwendaka ve na muntu yina vwandaka kikata, mpofo, bankonzo, to na muntu yina vwandaka ningana ve; mu banza ya vwandaka na mpasi ya prostate, mu banza yandi vwandaka na kimbevo mosi bakaka ntangu ya yinda. Yandi vwandaka na yawu bamvula makumi tatu na nana. Ya zolaka kusala yandi yimbi ve, ya zolaka kufwa yandi ve. Yandi vwandaka ya kulala na zulu ya payasi. Mpe Yandi tubaka, “Nge zola kubeluka?”

⁷⁴ Mpe muntu yango tubaka, “Mu ke na muntu ve ya kukotisa munu na masa, kasi na yina mu vwanda kulumuka, mbote, muntu mosi vwanda luta ntete na ntwala ya munu.” Beno me mona, yandi lendaka tambula, yandi lendaka mona, yandi lendaka kutambula, kasi yandi vwandaka kaka ya kulemba.

⁷⁵ Mpe Yesu tubaka na yandi, “Telama. Baka mbeto ya nge mpe kwenda na yinzo ya nge.” Mpe ba yufulaka Yesu kiuvu samu na yawu, na yina beno ke bambuka moyo ti Masonuku me tuba mutindu yina.

⁷⁶ Kuyituka ve! Kana Yandi lendaka kwisa na Jeffersonville na nkokila yayi mpe kusala mutindu yina, ba zolaka kaka kutubila Yandi.

⁷⁷ Kasi, beno bambuka moyo, Yandi kwisaka samu na kusala kima mosi, yina vwandaka luzolo ya Nzambi. Ntangu yayi, ya kele na Santu Jean 5:19, beno ke kuzwa mvutu. Yandi tubaka, “Kieleka, kieleka, Mu ke tuba na beno, Mwana lenda sala kima mosi ve na Yandi mosi; kasi yina Yandi ke mona Tata ke na kusala, yawu yina Mwana ke sala.”

⁷⁸ Ntangu yayi, ba zolaka zaba ti ya vwandaka nsiamisa ya profesi ya Moise, “Samu Mfumu Nzambi ya beno ke basisila beno Profete mutindu munu.”

⁷⁹ Beno me bakula, ntangu Yandi monaka muntu yayi, Yandi tubaka... Yesu zabaka ti yandi vwandaka na kimbevo yina bamvula mingi. Beno me mona, mutindu ya vwandaka Profete, Yandi monaka muntu yina na kimbevo yina; mpe Yandi kwendaka kuna mpe pasulaka—pasulaka nzila ya Yandi na kulutaka na kati ya bantu yina, malembe-malembe na kati ya bantu, tii kuna Yandi monaka muntu yina.

⁸⁰ Yandi lutaka kikata, nkondo, mpofo, mpe muntu yina vwandaka ningana ve, na yina ya vwandaka Muntu mosi ya kufuluka na mawa. Kasi, *kukabula mpasi* kele “kusala luzolo ya Nzambi.”

⁸¹ Ntangu yayi, beto me mona Yandi, mutindu Yandi zolaka ve kuvukana na bawu, Yandi zolaka ve kuvwanda na kima ya kusala na bawu na bimvuka ya bawu, na yina Yandi vwandaka muntu ya kukondwa mfunu. Yandi zolaka kuvwanda na kima mosi ve...

⁸² Na nganda ya yina, Yandi kotaka na tempelo kilumbu mosi. Muntu yango kotaka kuna mpe monaka ti yinzo ya Nzambi vwandaka ya kufuluka na mvindu mutindu ya kele bubu yayi. Ba vwandaka sumba, ke tekisa, ke sobisa mbongo. Mpe Yandi balulaka bamesa yina vwandaka na mbongo; Yandi bakaka bansinga mpe tungaka yawu, mpe basisaka basobisi mbongo na tempelo na fimbu. Mpe Yandi talaka bawu na nganzi, mpe tubaka, “Ya me sonamaka,” alleluia, “Yinzo ya Tata ya Munu kele yinzo ya bisambu; mpe beno me sala yawu yinzo ya bamiyibi. Mpe beno, na binkulu ya beno, beno me kumisa misiku ya Nzambi kukondwa ngolo.”

⁸³ Oh, nkonga ya mutindu yina lendaka kwikila na Yandi? Ve, tata. Ba vwandaka na kati ya foto-foto ya bimvuka mutindu bangulu mpe mvindu ya kilumbu yina, tii ba vwandaka na kati ya muniololo ya mabuundu ti bawu lendaka kuwa kuningana ya Ngolo ya Nzambi ya Ngolo nionso. Kuyituka ve ti kento yina ya fioti lendaka simba kinkuti ya Yandi mpe kubeluka na nzila ya Yawu; mpe soda yina ya kukola malafu lendaka losila Yandi mate na kizizi mpe kuwa ata ngolo mosi ve! Ya ke tala mutindu beno ke pusana na Yawu. Ya ke tala na yina beno ke sosa. Ntangu beno ke kwenda na yinzo-Nzambi, ya ke tala na yina beno ke na kusosa.

⁸⁴ Ntangu yayi beto ke mona Yandi ya kutelama kuna. Na ntembe ve ti ba kebisaka bantu dezia, ba kebisaka . . . nganga-Nzambi kukebisaka bantu, “Ntangu yayi Yandi ke kwisa awa na Saba ke kwisa, mpe, ntangu Yandi ke kwisa, beno kuwa Yandi ve. Ntangu yayi, beno fwana kwenda mpe beno vwanda, kasi beno vwanda na bukebi ve na yina Yandi ke tuba, samu Yandi kele ya kimvuka ya beto ve. Yandi kele muntu ya kukondwa mfunu. Yandi ke na kalati ya kimvuka ve. Yandi ke na organ- . . . yandi ke na papié ya organisation ve. Yandi ke na kima ya mutindu yina ve.”

“Nani Yandi kele?”

⁸⁵ “Mwa renegat yina me butuka kuna, na lubutuku ya kimakangu, na yinzo ya kisadi mabaya, yina mama kuzwaka kivumu ya Yandi na ntwala bawu kwelana, mpe ba ke na kubumba diambu yango na kutubaka ti ya vwandaka kima ya mazulu.

⁸⁶ “Beto zaba ti, ntangu Mesiya ke kwisa, Yandi ke kulumuka na ba-corridor ya Mazulu mpe ke kwenda na nganga-Nzambi ya beto ya mbuta mpe ke tuba, ‘Munu yandi yayi, Caiphe.’” Kasi beto me mona ti Yandi salaka mutindu yina ve, samu ya me sonamaka ve na kati ya Ndinda. Ya vwanda kinkulu ya bantu yina salaka ti bawu kwikila mutindu yina.

⁸⁷ Ndinda me tuba ti Yandi ke zolaka kwisa kaka mutindu Yandi kwisaka. Mpe Yandi vwandaka kuna, ke tanga Ndinda, mpe tubaka na bawu, “Disonuku yayi me lunga na ntwala ya beno.” Mpe kasi ba lembanaka kaka na kumona Yandi to na kuzaba Yandi, mutindu bawu salaka na bansungi yankaka nionso.

⁸⁸ Noé tubaka kima ya mutindu yina, kilumbu yina yandi kotaka na nzaza mpe kangaka mwelo. Moise lendaka zibula nela yina na zulu ya nzaza, yandi talaka na zulu ya kimvuka . . . Beno bambuka moyo, Nzambi kangaka kielo. Mpe yandi lendaka tuba, “Bubu yayi Disonuku yayi me lunga na ntwala ya beno,” kasi ntangu vwandaka me luta mingi samu na bawu na ntangu yina. Yandi longaka bamvula nkama mosi na makumi zole, samu na kumeka na kukotisa bawu na masuwa yina yandi vwandaka tunga, yandi vwandaka kutuba ti Masonuku me tuba, “MUTINDU ME TUBA MFUMU, mvula ke noka,” kasi bawu vingilaka ntangu mingi. Kasi Noé lendaka tuba kaka ti, “Bubu yayi, kilumbu yayi, Disonuku yayi me lunga.”

⁸⁹ Moise, kaka kilumbu yina Dikunzi ya Tiya kulumukaka na zulu ya Mongo Sinaï mpe ndimaka kimbangi ya yandi, Moise lendaka tuba, “Bubu yayi Disonuku yayi me lunga.”

⁹⁰ Moise, beno zaba, yandi vwandaka muntu yina Nzambi bokilaka, profete. Mpe ntangu ba bokilaka yandi, na kuvwandaka profete, yandi vwandaka na nzingilu ya mazulu. Samu na kuvwanda profete, yandi lendaka kutana na Nzambi

mbunzu na mbunzu mpe kusolula na Yandi. Mpe kima yankaka, yina yandi tubaka fwana salama, to muntu mosi ve zolaka kwikila na yandi.

⁹¹ Na yawu muntu mosi ve ke na muswa ya kukibokila yandi mosi mutindu yina tii kuna yandi ke solula mbunzu na mbunzu na Nzambi, na manima ya ntoto ya kuyuma kisika mosi kuna, kisika yandi me kutana na Nzambi, yandi mosi. Mpe bantu yina nionso ke kwikilaka na Nzambi ve na yinza lendaka kutendula yawu ve na bantendulu ya bawu; yandi vwandaka kuna, yandi zaba ti ya ke salama. Muklisto nionso yina ke na nzingilu yina na ntwala bawu tubila kima mosi ya kuvwanda Muklisto. Nzingilu ya beno mosi!

⁹² Mu tubaka na mwana mpangi ya munu ya bakala, na mwa ntangu fioti me luta, mwana-bakala ya fioti ya Catholique, yandi tubaka, "Noko Bill, mu kwendaka mbangu na ndambu mosi mpe yankaka, mu me kwendaka bisika nionso, samu na kuzwa kima mosi." Mpimpa na manima ya mpimpa, na ntwala lukutakanu yayi kubanda, yandi vwandaka kudila. Mpe na kati ya mpimpa, yandi vwandaka kulota bandosi ti yandi vwandaka kukota awa, yandi kwisaka mbangu na autel, kisika ba vwandaka kulonga, mpe yandi ndimaka ti yandi salaka yimbi.

⁹³ Mu tubaka, "Melvin, ya vwanda konso kisika yina nge ke meka na kukwenda, mabuundu yikwa nge me kota, ba 'Mbote Maria,' yikwa nge me tuba, to masakumunu yikwa nge me kuzwa na muntu, nge fwana kubutuka diaka na Mpeve ya Nzambi. Yawu yina kaka kima ke sepelisa ntima ya muntu."

⁹⁴ Ya ke, mu zaba ti ba me yingisa, bubu yayi, kubutuka mbala ya zole, ya ke kaka kupesa mbote na mulongi mpe kutula nkumbu ya beno na buku. Kasi, bankundi ya munu, yina kele dogme. Ya ke Kieleka ya Biblia ve. Kana ya zolaka vwanda, ba-Actes ya Bantumwa, na kapu 2, ba zolaka tanga mutindu yayi, "Ntangu Kilumbu ya Pentecote kukumaka, pasteur basikaka mpe pesaka mbote na bantu."

⁹⁵ Kasi ya me tuba, "Ntangu Kilumbu ya Pentecote kukumaka," na mbiekolo ya Dibuundu, "makelele mutindu kitembo ya ngolo katukaka na Zulu, mpe fulukaka na yinzo nionso sika bawu vwandaka." Ya ke mutindu yina Mpeve-Santu kwisaka na ntangu ya ntete. Ya ke mutindu yina Yawu ke kwisaka ntangu nionso kubanda na ntangu yina. Yandi kele Nzambi, mpe ke sobaka ve. Ntangu yayi, Yawu ke tutisa bantu disakuba.

Ba ke tuba, "Yina vwandaka samu na kilumbu yankaka."

⁹⁶ Mbote, Yandi kele mutindu mosi mazono, bubu yayi, mpe kukonda nsuka. Konso ntangu Dibuundu me kuzwaka Mpeve-Santu, Ya ke kwisaka ntangu nionso mutindu Yandi salaka na ntangu ya ntete, na nsi ya mukanda ya munganga, Actes 2:38; me sobaka ata fioti ve, ya ke soba ata fioti ve.

⁹⁷ Mutindu mukanda ya dokotolo samu na kimbevo. Yandi ke sonika mukanda samu na kimbevo, dokotolo ke sala yawu. Mpe beno nata yawu na pharmacien mosi ya luvunu, mpe yandi ke tula bima mingi yina ke lembisa ngolo ya yawu, ya ke lemba mingi ti ya ke sala kima ya mbote ve; kana yandi tula ndikila mingi na kati ya yawu, ya ke kufwa beno. Ya fwana vwanda ya kusonama kaka mutindu dokotolo sonikaka yawu.

⁹⁸ Mpe mukanda ya dokotolo samu na mutindu ya kuzwa Mpeve-Santu ya me pesama na beto na Dokotolo Simon Pierre, na Kilumbu ya Pentecote. “Mu ke pesa beno mukanda samu na kimbevo. Beno balula bantima ya beno, beno nionso, mpe beno baka mbotika na Nkumbu ya Yesu Klisto samu na mulemvo ya masumu, mpe beno ke kuzwa dikabu ya Mpeve-Santu. Samu ti mukanda kele samu na bayina kele ntama, mpe bayina kele ntama mutindu Mfumu Nzambi ya beto ke bokila.” Mukanda ya kukonda nsuka!

⁹⁹ Moise vwandaka na nzingilu yayi. Yandi kwendaka kuna na yinsi mpe yandi bandaka na kutuba na bantu, “Mu me kutana na Dikunzi ya Tiya. Ya vwandaka mulaka ya tiya. Mpe Yandi tubaka na munu na kutuba na beno, ‘MU KELE YINA KELE. Kwenda kuna; Mu ke vwanda na nge. Simba nkawa na diboko ya nge mpe telemisa yawu na zulu ya Egypte; nionso yina beno ke lomba, ya ke salama.’”

Mbote, mbala yankaka nganga-Nzambi mosi tubaka, “Ya ke buzoba!”

¹⁰⁰ Kasi ntangu bawu monaka bisalu ya kieleka ya yayi, kusalama, bawu kangaka ntima ntangu ya yinda ve. Bawu zabaka ti Nzambi fidisaka yandi.

¹⁰¹ Na yina, kana Moise tubaka ti yandi monaka yawu, mpe siamisaka yawu ti ya vwandaka Kieleka, na yina Nzambi me tumama na ngolo, kana ya kele Kieleka, na kundima mpe kusiamisa ndinga ya muntu yina, mutindu Kieleka. Ya kieleka.

¹⁰² Kana Yesu Klisto telamaka kuna mpe tangaka, kilumbu yina, “Bubu yayi Ndinga yayi me lunga na ntwala ya beno,” Nzambi me tumama na ngolo na kusala ti Ndinga yina kusalama.

¹⁰³ Beto me telama awa na nkokila yayi samu na kutuba, ti, “Yesu Klisto kele mutindu mosi mazono, bubu yayi, mpe kukonda nsuka.” Nzambi me tumama na ngolo na kusiamisa ti ya ke mutindu yina, samu Yawu kele Ndinga ya Yandi. Ntangu yayi, yinki yawu ke sala? Ya ke lomba lukwikilu, na kukwikila Yawu. Ya ke lomba lukwikilu, na kukwikila Ndinga ya Yandi, ti Yawu kele Kieleka.

¹⁰⁴ Beno tala yina salamaka ntangu Moise basisaka bana kuna, mpe bayina nionso landaka yandi. Bayina nionso landaka yandi ve bikanaka na Egypte. Kasi bayina landaka Moise, ntangu bawu kumaka na Mubu ya Mbwaki mpe kumaka na ntoto ya kuyuma, Nzambi kulumukaka na zulu ya Mongo Sinaï. Dikunzi

ya Tiya yina fikaka mongo ya muvimba na tiya, mpe Ndinga mosi basikaka kuna, mpe Nzambi pesaka misiku kumi.

¹⁰⁵ Moise lendaka tambula kuna na ntawala ya bantu, mpe kutuba, “Bubu yayi Disonuku yina mu tubaka na beno, mutindu profete ya Yandi, me lunga bubu yayi. Mu tubaka na beno ti Nzambi me kutana na munu, mpe na zulu kuna na mulaka ya tiya, na Dikunzi ya Tiya, mpe Yandi tubaka na munu mutindu yayi, ‘Mu ke... Yayi ke vwanda kidimbu. Nge ke vutula diaka bantu yina na kisika yayi awa.’ Mpe ya kele Nzambi, na kati ya Dikunzi ya Tiya mosi yina mu tubaka na beno ti Yandi vwandaka, kuna na zulu ya mongo. Bubu yayi profesi yayi me lunga. Yandi yayi awa ke na kusiamisa ti mambu yina mu tubaka kele Kieleka.”

¹⁰⁶ Nzambi pesa beto bantu mingi mutindu yina, yina kele ya kuvedila mpe ya ludedomo, mpe yina ke tuba Kieleka, ti Nzambi ya Ngolo nionso lendaka siamisa ti Ndinga ya Yandi kele kaka Kieleka! Yandi kele kaka mutindu mosi mazono, mpe kukonda nsuka. Samu na yinki Yandi lendaka kusala yawu ve? Yandi silaka na kusala yawu.

¹⁰⁷ Josué lendaka tuba mutindu mosi, kilumbu yina yandi vutukaka na Kades-barnéa, kisika ba salaka nzietolo ntama kuna na ntoto ya kuyuma. Ba vwandaka kutula ntembe ti yinsi yango kuvwanda ve mutindu yinsi yina Nzambi tubaka ti ya zolaka vwanda. Kasi Nzambi tubaka na bawu ti ya vwandaka yinsi ya mbote, ya vwandaka ya kufuluka na miliki na mafuta ya niosi. Mpe Josué na Caleb vwandaka kaka bantu zole yina kwikilaka yawu, na nganda ya kumi yina me bikala. Ntangu bawu vutukaka, bawu vwandaka na nzikisa; bawu vwandaka na kikunku ya bambuma ya raisin yina bantu zole ya ngolo lendaka kaka kunangula.

¹⁰⁸ Josué na Caleb lendaka telama kuna mpe kutuba, “Bubu yayi Disonuku yayi me lunga. Nzikisa yawu yayi ti ya kele yinsi ya mbote.” Ya kieleka. Samu na yinki? “Ya kele na nzikisa ti ya kele yinsi ya mbote. Wapi sika beno me monaka ntete bima ya mutindu yina, na Egypte? Ya vwandaka na bisika ya mutindu yina ve. Kasi Bubu yayi Disonuku yayi me lunga.”

¹⁰⁹ Yandi lendaka tuba diambu yango, mutindu mosi, ntangu yandi pesaka profesi mpe tubaka ti bibaka ya Jericho lendaka kubwa na manima ya bawu ziungaka yawu bambala sambwadi, bilumbu sambwadi, bantangu sambwadi na kilumbu. Mpe ntangu bawu ziungaka yawu na ntangu yina ya nsuka, bibaka kubwaka. Josué lendaka telama kuna mpe kutuba, “Bubu yayi, Kapitene ya Mbuta ya makesa ya Mfumu yina tubaka na munu na basabala me luta ti ya ke salama mutindu yayi, bubu yayi Disonuku yayi me lunga.” Bibaka vwandaka ya kubwa kuna, ya kutandama na zulu ya ntoto. “beno kwisa, beto kwenda kubaka yawu. Yawu kele ya beto. Bubu yayi Disonuku me lunga.”

¹¹⁰ Wapi mutindu ya kele kitoko, bantu ya Nzambi telamaka samu na bima yina kele ya kieleka!

¹¹¹ Israel, na nzadi, ntangu bawu zolaka kubaka yinsi, kuzabuka. Wapi mutindu bawu ke sala yawu? Ya kele Ngonda ya yiya. Masa vwandaka ya kufuluka samu myula mpembe me kituka masa, kuna na Judée. Oh, yinki general yayi ya kulutila yimbi Nzambi monanaka, na kunata bantu ya Yandi kuna, na Ngonda ya yiya, ntangu Jourdain vwandaka ya kufuluka kulutila mgingi. Na bantangu yankaka...

¹¹² Mu lendaka telama awa, kana mu vwandaka na ntangu, samu na kupesa beno mwakinsweki mosi. Na bantangu yankaka beno ke vwanda kuna na cancer, to beno lendaka vwanda na kimbevo mosi; beno ke banza, “Samu na yinki, munu, mutindu Muklisto lendaka vwanda mutindu yayi? Samu na yinki mu lendaka vwanda mutindu yayi, kana mu kele Muklisto?” Na bantangu yankaka Nzambi ke bika bima kukuma mpimpa mingi ti beno lendaka tala na zulu ve, na lweka, to kisika yankaka, na manima Yandi ke kwisa mpe ke sala nzila samu na beno, ti beno lendaka tuba, “Bubu yayi Disonuku yayi me lunga, yina Yandi silaka na kusala.”

¹¹³ Yandi bikaka bana ya ba-Hebreux kutambula na kati ya dibulu ya tiya. Bawu tubaka, “Nzambi ya beto kele na kiyeka ya kukuula beto na tiya yayi na kati ya dibulu ya tiya. Kasi, ya vwanda konso mutindu yina, beto ke fukimina ve kifwanusu ya nge.” Ntangu bawu basikaka kuna, nsunga ya tiya na zulu ya bawu... nsunga ya tiya ve, mu zola tuba, na zulu ya bawu ve; bawu lendaka tuba, “Bubu yayi Disonuku yayi me lunga.”

¹¹⁴ Ntangu Daniel basikaka na dibulu ya bankosi, yandi lendaka tuba mutindu mosi.

¹¹⁵ Jean Baptiste. Na manima ya bamvula nkama yiya ya malongi ya dibuundi, kuyituka ve dibuundi vwanda na kati ya mvindu na ntangu yina! Ntangu yandi basikaka na ntoto ya kuyuma, Jourdain, yandi lendaka telama kuna na kumu, mutindu yandi salaka, mpe kutuba, “Bubu yayi Disonuku yayi, Esaie 40, me lunga.”

¹¹⁶ Wapi mutindu mu lendaka telama awa mpe kutuba na beno yina nganga-Nzambi yina ya kiboba tubaka na munu! Yandi tubaka, “Mwana ya munu, nge me manisa ata fioti ve Nsangu yina.”

Mu tubaka, “Vwanda swi.”

Yandi tubaka, “Nge zola tuba ti ba-Pentecotiste yina ke mona yawu ve?”

Mu tubaka, “Ve.”

¹¹⁷ Yandi tubaka, “Mu ke mona yawu.” Mpe nganga-Nzambi ya Catholique, mpe! Uh-huh. Yandi tubaka, “Samu na yinki beno ke kwenda na ntwala ve?”

Mu tubaka, “Vwanda swi.”

Yandi tubaka, “Nkembo na Nzambi! Mu me mona yawu.”

¹¹⁸ Mpe kaka na ntangu yina Mpeve-Santu kulumukaka na zulu ya mpangi ya yandi ya kento, yina vwandaka kuna na lukutakanu. Mpe yandi telamaka, yandi tubaka na bandinga ya malu-malu, mpe pesaka ntendulu ya diambu yina nganga-Nzambi na munu vwandaka tubila, na estrade. Yinzo-Nzambi ya muvimba, kisika ya muvimba, bandaka kuboka na ndinga ya ngolo. Ya landilaka tii na lukutakanu ya Oral Roberts na sabala me luta, to na sabala yina na ntwala ya sabala me luta, mpe ba vwandaka tubila yawu kaka na lukutakanu. Wapi mutindu nganga-Nzambi yina . . . Kuna na nsi ya Mpeve-Santu, ya monisamaka pwelele na nzila ya kento mosi, mpangi ya yandi ya kento mu ke kwikila ya vwandaka, yina vwandaka salama kuna na estrade, mpe monisaka pwelele diambu yina beto vwandaka bumba.

¹¹⁹ Ngunga yina beto ke na kuzinga, bubu yayi Disonuku yayi me lunga. Bubu yayi Bansemo ya nkokila me kwisa, mpe beto me lembana na kumona Yawu. Beno tala.

¹²⁰ Jean tubaka, “Bubu yayi mu kele ‘ndinga ya yina ke boka na ntoto ya kuyuma,’ mutindu tubaka profete Esaie. Beno yidika nzila ya Mfumu!”

¹²¹ Bawu bakulaka yawu ve. Bawu vwandaka tuba, “Oh, nge kele Yesu . . . nge kele—nge kele Klisto,” mu zola tuba.

¹²² Yandi tubaka, “Mu kele Klisto ve.” Yandi tubaka, “Mu me lunga ve na kukangula bansinga ya basapatu ya Yandi. Kasi,” yandi tubaka, “Yandi kele na kati ya beno, kisika mosi kuna,” samu yandi vwandaka ndima ti Yandi lendaka vwanda kuna. Yandi lendaka vwanda na kilumbu ya yandi, samu Nzambi tubaka na yandi ti yandi lendaka talisa Mesiya.

¹²³ Kilumbu mosi Bakala mosi ya ntwenia vwandaka luta kuna, mpe yandi monaka mutindu Nsemo na zulu ya Yandi, kidimbu mosi. Mpe yandi bokaka, “Beno tala Mwana-dimeme ya Nzambi! Bubu yayi Disonuku yayi me lunga na ntwala ya beno.” Ya kieleka.

¹²⁴ Na Kilumbu ya Pentecote, mutindu Pierre telamaka kuna mpe tangaka Disonuku ya bawu, ya Joel 2:38. Ntangu, bawu nionso vwandaka kuseka, bantu yina. Bawu lendaka kutuba ve na ndinga ya bawu mosi. Bawu vwandaka pitakana kima yankaka. Biblia me tuba, “Milaka ya kukabuka.” *Ya kukabuka* kele mulaka ya “kukabisa,” bawu vwandaka tuba kima mosi ve, bawu vwandaka pitakana kaka. Bawu vwandaka kwenda mbangu sika na sika mutindu nkonga ya bantu yina me kola malafu!

¹²⁵ Bawu nionso tubaka, “Mbote, bantu yayi me kola malafu. Beno tala bawu, beno tala mutindu ba ke na kusala, bakento

yayi na babakala yayi. Ba ke na kusala mavanga,” mutindu yina vwandaka tuba nkonga ya misambidi ya kilumbu yina.

¹²⁶ Pierre telamaka na kati ya bawu, yandi tubaka, “Bakala mpe bampangi, beno yina ke zingaka na Jérusalem, mpe beno yina ke zingaka na Judée, beno zaba ti bantu yayi me kola malafu ve, mutindu beno ke banza, samu ya kele ngunga ya yivwa ya suka. Kasi yayi kele mambu yina tubaka profete Joel, ‘Ya ke salama ti na bilumbu ya nsuka, Mu ke tiamuna Mpeve ya Munu na zulu ya bantu nionso.’ Bubu yayi Disonuku yayi me lunga.” Ya kieleka.

¹²⁷ Luther kwisaka na ntangu ya kulunga. Wesley kwisaka na ntangu ya kulunga. Pentecote kwisaka na ntangu ya kulunga. Kima mosi ve me basika na nzila.

¹²⁸ Ntangu yayi mu ke lomba na beno kutala nsungi mpe ntangu yina beto ke na kuzinga ntangu yayi, samu na Ndinga yina ba silaka samu na bubu yayi. Kana na bansungi yina yankaka, bantu lendaka tuba, “bubu yayi Disonuku yayi,” “bubu yayi Disonuku yayi,” na yina yinki samu na Disonuku ya bubu yayi? Yinki ba silaka samu na bubu yayi? Wapi sika beto kele? Na wapi ngunga beto ke na kuzinga; ntangu montele ke na kubula, montele ya bantu ya mayele, ya me bikala minuti tatu na ntawala kati-kati ya mpimpa? Yinza me kota na kidi-kidi. Dibuundu kele na zulu ya mbeto ya kubeba. Muntu mosi ve me zaba kisika bawu kele. Wapi ntangu ya kilumbu ya kele? Yinki samu na Disonuku ya kilumbu yayi? Mutindu ya dibuundu, to, mutindu ya dibuundu ya bubu yayi!

¹²⁹ Na yinza, politiki, systeme ya beto ya yinza ya muvimba, kele ya kupola mutindu ya lendaka vwanda. Mu kele muntu ya politiki ve. Mu kele Muklisto. Kasi, ya ke kisalu ya munu ve na kutubila politiki, kasi mu ke zola kaka kutuba ti ba ke ya kupola na balweka nionso zole.

¹³⁰ Mu me ponaka mbala mosi, ya vwandaka samu na Klisto; mu fwana nunga kaka. Diabulu ponaka samu na munu ve, mpe Klisto ponaka samu na munu; ya ke tala yina mu me pona. Mu ke na kiese samu mu me pona samu na Yandi; bika yinza kutuba yina bawu me zola. Mu ke kwikila kaka ti Yandi kele mutindu mosi mazono, bubu yayi, mpe kukonda nsuka. Yandi ke siamisa yawu. Ya kieleka Yandi ke sala yawu. Ya kieleka.

Kufuluka ya yimbi, ya bubandi ya bana!

¹³¹ Beno tala yinsi ya beto, yina vwandaka ntete fololo ya ntoto. Démocratie ya beto ya nene ba bandaka yawu na—na ntangu ya . . . na nsamunu ya dipanda. Mpe nsamunu ya dipanda ndimamaka, mpe beto kuzwaka democratie. Mpe batata ya beto ya ntama, mpe bima yina bawu salaka; beto me kuzwa yinsi ya nene.

¹³² Kasi ntangu yayi yandi ke na kupola, ya ke na kupanzana, ya ke na kuningana, mpe ya ke na kubeba. Mpe ba ke na kumeka na kutuma bantu na ngolo, samu na kuzwa mbongo ya kutinda

kuna, samu na kusumba kimpangi na bambeni ya bawu; ba ke na kuvutudila beto yawu na mbunzu. Mvita ya ntete ya yinza ya muvimba, mvita ya zole ya yinza ya muvimba, mpe beto ke na kukwenda na yina ya tatu. Ya kieleka. Politiki me pola, me beba, me pola tii na nsi. Kaka mutindu Matthieu 24 me tuba ya ke vwanda, "Yinsi mosi ke nwanisa yinsi yankaka, yinsi mosi ya ntinu ke nwanisa yinsi ya ntinu yankaka." Bima yayi nionso ke salama. Beno tala yayi ntangu yayi. Mbote mingi.

¹³³ Beno tala yankaka, kufuluka ya kusosa-sosa ya bantu ya mayele. Ntangu yayi, na ntangu mosi, kaka... Nkooko ya munu ya bakala vwandaka kwenda tala nkooko ya munu ya kento, na pusu ya bangombe. Ntangu yayi ya ke avion à reaction, to mpe masini mosi ya orbite na mupepe, na kati ya mpwasa. Bunene ya yawu... Wapi mutindu, nani me tuba mutindu yayi? Daniel 12:4, me tuba, "Luzabu ke kuma mingi na bilumbu ya nsuka." Beto ke mona ngunga yango beto ke na kuzinga. Beno tala ntangu yayi mutindu yinza kele, mutindu science kele.

¹³⁴ Mpe beno tala diaka, bubu yayi, na systeme ya beto ya lukolo. Ntangu beno meka ve na kumanga yayi. Mu ke na bitini ya zulunale, ba ke longa sexe na mabuu-...na balukolo ya beto, ya balongoki ya bantwenia kuvukisa nzutu mosi na yankaka, samu na kutala bawu lenda zinga luzingu ya bankwelani na kati ya yinza. Yinga, tata.

¹³⁵ Yinki kutuba samu na bunganga-Nzambi ya beto? Na nnokila yayi mu me kuzwa kitini ya zulunale mosi. Kuna na Los Angeles, na Californie, nkonga mosi ya banganga-Nzambi, ba-Baptiste mpe ba-Presbytérien, milongi, ba me nata nkonga ya bantu ya sexe mosi mpe yina vwandaka vukisa nzutu na kati ya bawu, ba vwandaka meka na kunata bawu na Nzambi. Na ntangu, yina kele mosi ya bansingulu ya ngunga yayi, ya Sodome! Mpe ata mpe musiku me kanga bawu.

¹³⁶ Ntangu yayi beto kele wapi? Systeme ya beto ya muvimba me pola na nsi ya beto. Mu me mona kufuluka ya ba-homosexuel na Etats-Unis ti ya me mata makumi zole to makumi tatu na zulu ya nkama mosi na mvula me luta. Beno banza na yawu, bakala ke zinga na bakala, kaka mutindu bawu salaka na Sodome.

¹³⁷ Kufuluka ya yimbi, bubandi ya bana! Yinki ntangu yayi beto ke na kuzinga? Babu yayi Ndinga yayi ya profesi me lunga.

¹³⁸ Yinza ya misambidi, dibuundu yawu mosi, dibuundu, dibuundu yina ba me bokila na kubasika, yina beto ke bokila dibuundu yina ba me bokila na kubasika, nsungi ya nsuka ya dibuundu, nsungi ya dibuundu ya Pentecote, wapi ya kele? Ya ke na Laodicée, mutindu Masonuku me tuba.

¹³⁹ Babu yayi ba me katula bibaka. Bakento ya bawu kele ndambu ya kulwata. Babakala ya bawu kele... Ya ke kima mosi ya kiadi mingi. Bayankaka na kati ya bawu me kwelanaka mbala tatu to yiya, ba ke na conseil ya ba-diacre, mpe bima yankaka.

Ba me lemba, mpe ba me kotisa kubeba, samu ba me kota na kimvuka mosi mpe ba me vukana na yinza.

¹⁴⁰ Mpe, bubu yayi, ba ke na bayinzo ya kulutila kitoko, yina ba me kuzwaka ntete ve. Kisika mosi kuna, mosi ya bawu ke na kutunga kivinga mosi ya ba-million makumi tanu ya ba-dollars, ba-million makumi tanu. Ba-Pentecotiste! Ba vwandaka vwanda kuna na nsongi, bamvula makumi zole na tanu me luta, na kubulaka tambourin. Ba vwandaka tuba, “Beto...”

¹⁴¹ Samu, Masonuku me tuba, na Apocalypse 3, ti nge kele “‘Mvwama,’ nge me tuba, ‘Mu kele mvwama. Mu me vwanda mutindu ntinu ya kento. Mu ke na mfunu ya kima mosi ve.’ Mpe mu me zaba ti nge ke na kuzinga na kati ya kiadi, nge ke na kati ya mpasi, nge kele mputu, kinkonga, mpofo, mpe nge zaba yawu ve!”

¹⁴² Bubu yayi Disonuku yayi me lunga na ntwala ya beno. Amen! *Amen* zola kutuba “ya vwanda mutindu yina.” Mu ke na kutuba ve amen na munu mosi, kasi mu zola tuba ti mu ke kwikila ti Yawu kele Kieleka. Bubu yayi Disonuku yayi me lunga.

¹⁴³ Dibuundu ya Pentecote kele na mutindu ya Laodicée. Oh, ba ke na kudumuka mpe ba ke na kuboka, mpe ba me natama na ntangu musiki ke na kubula. Ntangu musiki ke bika na kubula, to musiki ya beatnik mutindu bayankaka na kati ya bawu ke bulaka mpe ke bokila yawu Buklisto, mpe na ntangu ya ke suka, nkembo nionso me kwenda. Yinga.

¹⁴⁴ Kana ya kele lukumu ya kieleka ya Nzambi, ya ke vwanda ve na ba-sifflet mingi mpe ngolo mingi—mingi na yinza samu na kusukisa yawu. Ntangu ya me katuka kieleka na Nzambi, ya ke na mfunu ve ti ba bula musiki. Ya ke lomba Mpeve ya Nzambi kukulumuka na zulu ya yawu. Yawu yina ya ke lomba.

¹⁴⁵ Mpe ba me zimbanaka Yawu kubanda ntama, samu ba me tula dikabu ya Mpeve-Santu, “nzikisa ya kieleka kele kutuba bandinga ya malu-malu.” Mpe mu me kuwa bampeve ya yimbi mpe bandoki ke tuba na bandinga ya malu-malu.

¹⁴⁶ Mpeve-Santu kele Ndinga ya Nzambi na kati ya beno, yina ke kukisiamsa Yawu mosi na nzila ya kundima Ndinga yina. Na nganda ya yina, ya lenda vwanda Mpeve-Santu ve. Kana ya me tuba ti ya kele Mpeve-Santu, mpe ya ke manga Ndinga mosi ya Biblia yina, ya lenda vwanda ve Mpeve-Santu. Ya kele nzikisa ti beno ke kwikila to ve.

¹⁴⁷ Beno tala kidimbu yankaka ya nene. Ba-Juif kele na yinsi ya bawu; yinsi ya bawu mosi, mbongo ya bawu mosi, ba kele mosi ya Nations Unies. Ba ke na makesa ya bawu mosi. Ba ke na bima nionso. Ba ke na yinsi ya bawu mosi; na yina, Yesu tubaka, “Beno bakula kingana yina ke lakisaka beno yinti ya fiki.” Bawu yina, me yutuka na yinsi ya bawu. Bubu yayi Disonuku yayi me lunga, ba-Juif kele na yinsi ya bawu.

¹⁴⁸ Bubu yayi Disonuku yayi me lunga, Nsungi ya Dibuundu ya Laodicée.

¹⁴⁹ Bubu yayi Disonuku yayi, Matthieu 24, me lunga. Yinza ke na kati ya kubeba, kima ya muvimba; bayinsi ke nwanisa bayinsi yankaka, bakuningana ya ntoto na bisika ya mutindu na mutindu, bitembo ya ngolo mingi ke na kubwa, bayinsi ke na kuningana, mpe nionso yina, mambu ya kiadi bisika nionso. Bubu yayi Disonuku yayi me lunga.

¹⁵⁰ Ntangu yayi beto me mona mutindu yinza kele. Beto ke mona kisika dibuundu ya kieleka, ya kieleka... Organisation, denomination, beto ke mona kisika yawu kele. Beto ke mona kisika bayinsi kele. Mpe beto ke mona ti bubu yayi bansilulu yayi me lunga.

¹⁵¹ Ntangu yayi, kasi na kilumbu yayi ya ke vwanda na Nkuna ya Kimfumu ya Abraham, ya kulutila. Ya kieleka yawu yina Yawu zolaka vwanda, ya zolaka vwanda Kento ya makwela ya Kimfumu samu na Mwana ya Kimfumu, yina ba silaka. Mutindu mu tubaka mazono na nkokila, ya ke vwanda nkuna ya kimuntu ve, ya ke vwanda Nkuna ya kimpeve. Ya ke vwanda Kento ya makwela yina ke basika, yina ke vwanda Nkuna ya Kimfumu ya lukwikilu ya Kimfumu ya Mwana ya Kimfumu ya Abraham. Yandi ke monana na bilumbu ya nsuka, mpe ntangu na kisika kele nsilulu yina ba me pesa Yandi.

¹⁵² Landila Malachie 4, Disonuku mosi, ya ke vwanda na Nsangu mosi yina ke ningisa bantima ya bantu samu na kuvutula bawu diaka na batata bantumwa. Ya ke vwanda na muntu mosi ke kota na kisalu, muntu mosi na ngolo ya Elie, yina ke kota na kisalu; muntu mosi ya ntoto ya kuyuma ke basika, mpe yina ke vwanda na Nsangu mosi ke vutula mbala mosi na Ndinga diaka. Ya ke na ngunga yayi beto ke na kuzinga.

¹⁵³ Na yina, beno tala ntangu yayi, mu ke yufula beno ntangu yayi, beno bantu yayi awa ya Jeffersonville. Na mvula 1933, Nsemo ya mazulu kulumukaka kuna na zulu ya nzadi, kilumbu yina ntangu mu vwandaka botika bantu nkama tanu na Nkumbu ya Yesu Klisto, na ntangu mu vwandaka mwana-bakala ya bamvula makumi zole. Yinki Yandi tubaka, Jeffersonville? Yinki Yawu vwandaka kuna na nsi ya Bala-bala Spring, ntangu *Courier Journal*, mu kwikila ti ya vwandaka *Louisville Herald*, yina basisaka Yawu na meso ya bantu? Yawu mwanganaka na Presse Associée, tii kuna na Canada. Docteur Lee Vayle zengaka yawu na zulunale, kuna na Canada, na 1933.

¹⁵⁴ Ntangu mu vwandaka botika muntu ya kumi na sambwadi, na yisi ya Mbangi yayi na zulu ya munu; mpe beno zaba kitini ya disolo yina me bikala. Mpe ntangu mu vwandaka ya kutelama kuna, na kubotika muntu ya kumi na sambwadi, Nsemo mosi kulumukaka na Zulu, ya vwandaka sema na zulu kuna, mutindu Mbwetete yina ke na kukulumuka na Zulu. Ndinga mosi tubaka,

“Mutindu ba fidisaka Jean Baptiste na kukwisa na ntwala ya nkzwizulu ya ntete ya Klisto, Nsangu ya nge ke kwisa na ntwala ya Nkwizulu ya Yandi ya zole, na yinza ya muvimbba.” Bubu yayi Disonuku yayi me lunga.

¹⁵⁵ [Dibuundu ke na kusepela—Mu.] Bubu yayi! [Dibuundu ke na kusepela mingi mpe ke na kukumisa Nzambi.] Nzambi silaka yawu. Yinki salamaka? Bubu yayi Yawu me mwangana na yinza ya muvimbba.

¹⁵⁶ Mpe ntangu Nzambi kulumukaka kuna mpe tubaka mutindu yina, ntangu mu vwandaka mwana ya fioti, na kati ya mulaka ya tiya, to mulaka mosi kuna, ke pela na Dikunzi ya Tiya, awa na ba-Wathen na Utica Pike; mu vwandaka nata masa kuna, kubanda na kibumbulu tii na kisika yina ba vwandaka sala malafu ya tiya, beno zaba ti ya kele kieleka. Yandi tubaka, “Kunwa makaya ata fioti ve, to kunwa malafu ve, to kutula mvindu na nzutu ya nge ve, samu ya ke vwanda na kisalu mosi nge ke sala ntangu nge ke kuma mbuta.” Mu ke siamisa ti yina kele Kieleka, ti mu monaka Yawu. Mpe Nzambi, mutindu Yandi salaka na Moise, Yandi tubaka na ntwala nkonga ya bantu kuna, mpe tubaka, “Yayi kele Kieleka.”

Bubu yayi Disonuku yayi me lunga na kati ya beto.

¹⁵⁷ Beno tala yina Yandi tubaka samu na kuswasikisa mabanza, mpe wapi mutindu ya ke vwanda; kubanda na kutentika maboko na zulu ya bantu, tii na kuzabakinsweki ya ntima. Bubu yayi Disonuku yayi me lunga na ntwala ya beto.

¹⁵⁸ Bansilulu yayi ba salaka, beno tala, bansilulu yayi nionso me siamisama mpe me lunga na nzila ya Nzambi ya nsilulu. Beno tala, ba me namika yawu kuna na Washington, DC, na nkokila yayi, foto ya Wanzio ya Mfumu!

¹⁵⁹ Mutindu J. Lacy, mfumu ya FBI ya empreinte digitale mpe mikanda samu na luyalu ya Etats-Unis, zikisaka Yawu na Houston, Texas, mpe yandi tubaka, “Yayi kele Kivangu mosi kaka ya mazulu yina ba me bakaka ntete foto ve na yinza ya muvimbba.” Yandi fwana zaba yawu; yandi kele ya kulutila mbote na yinza, na ndambu yina.

¹⁶⁰ Beno tala, ba me namika Yawu kuna, mutindu Kieleka, Dikunzi ya Tiya mosi yina twadisaka Israel kuna na ntoto ya kuyuma. Ya ke na kutwadisa bubu yayi, Nsangu ya mutindu mosi, ya, “Kubasika kuna na Egypte!” Bubu yayi Disonuku yayi me lunga. Beno zaba Nsangu yina Yandi tubaka.

¹⁶¹ Beno tala vision ya Tucson, bamvula tatu me luta, ntangu mu vwandaka awa na bala-bala. Ntangu, Yandi tubaka, bamvula tanu na ntwala ya yina, “Kilumbu yina mbanza ke tula jalon na ntwala ya mwelo yina, nge ke kwenda na Weste.” Bantu ya tabernacle ya munu yina kele awa, me zaba prop- . . . na ntangu yina—yina. Ya kieleka.

¹⁶² Mpe kilumbu yina Tata Goynes mpe bayankaka vwandaka kuna, mpe bawu tulaka jalón yina, mu tubaka na kento ya munu, “Ya ke na kima mosi samu na yawu.”

Yandi tubaka, “Yinki ya kele?”

Mpe mu kwendaka mpe talaka na mwa buku ya munu. Ya vwandaka kuna.

¹⁶³ Mpe na suka yina landaka, na ngunga ya kumi, mu vwandaka kuna, na kivinga ya munu kuna, na ngunga ya kumi, Wanzio ya Mfumu kulumukaka. Yandi tubaka, “Kwenda na Tucson. Nge ke vwanda na lweka ya nord-weste ya Tucson, mpe kuna ke kwisa kimvuka ya Bawanzio sambwadi yina ke ningisa ntoto ya muvimba na nziunga ya nge.” Mpe tubaka, “Ya ke tuba na nge kuna yina ya kele.”

¹⁶⁴ Bantu yikwa ke bambuka moyo na yawu, awa, ntama kuna na ntwala yawu salama? [Dibuundu me tuba, “Amen.”—Mu.] Ya ke na bantu me vwanda awa na kivinga yayi na nkokila yayi, yina vwanda kuna ntangu ya salamaka.

¹⁶⁵ Mpe tubaka, “Bidimbu Sambwadi ya mansweki yina me bumbama ya Biblia ya muvimba ke zibuka, mpe ke lungisa Apocalypse 10, kisika ya me tuba ti ya ke na ntangu ya Nsangu ya Wanzio ya sambwadi ti bima yayi ke salama.” Bubu yayi Disonuku yayi me lunga na ntwala ya beto. Bubu yayi Disonuku yayi me lunga.

¹⁶⁶ Na mvula me luta, mu vwandaka ya kutelama na kisika yina mosi, Tata Wood awa na munu, beto vwandaka mata na zulu ya mongo, ya vwandaka ya kuyangama, samu kento ya yandi vwandaka ya kubela. Mpeve-Santu tubaka, “Lokuta ditadi yina kuna. Losa yawu na mupepe. Ntangu ya ke kubwa, tuba, ‘MUTINDU ME TUBA MFUMU, lusambusu ke kubwa na zulu ya ntoto.’ Tuba na yandi ti yandi ke mona diboko ya Nzambi, na ngunga ke kwisa na ntwala.”

¹⁶⁷ Mu tubaka na Tata Wood; yandi kele awa na nkokila yayi. Mpe, mu banza, bantu pene ya nana to kumi, kumi na tanu, yina vwandaka kuna na ntangu yina ntangu ya salamaka; na suka yina landaka, kisika Mfumu kulumukaka na katì ya kitembo mpe pasulaka mongo na nziunga ya beto, mpe zengaka bansongi ya bayinti, mpe salaka makelele ya ngolo mbala tatu, mpe tubaka, “Lusambusu me kwenda na Côte Ouest.”

¹⁶⁸ Bilumbu zole na manima ya yina, Alaska ya muvimba zolaka kudinda na nsi ya ntoto. Mpe kubanda ntangu yina, na zulu mpe na nsi ya Côte, lusambusu ya Nzambi ke bulaka na ngolo nionso rido yina ya kimpeve. Ya ke na rido ya kisengo, ya ke na rido ya bambu, mpe ya ke na rido ya disumu.

¹⁶⁹ Civilisation me sala nzietolo na mwini; mutindu mosi na Nsangu ya mbote. Ya me katuka na este mpe me kwenda na weste, mutindu mwini ke kwendaka. Mpe ntangu yayi Yawu kele

na zulu ya Côte Ouest. Yawu lenda kwenda ntama ve; kana Yawu kwenda ntama, Yawu ke vutuka diaka na este.

¹⁷⁰ Profete tubaka, “Kilumbu mosi ke vwanda yina ba lendaka bokila mpimpa to mwini ve,” kilumbu mosi ya mudidi, bamvula mgingi mpe ya lubungi, ba me zaba kaka wapi mutindu kukota na dibuundu mosi to kutula nkumbu na buku. “Kasi ya ke vwanda na Nsemo na ntangu ya nkokila.” Bubu yayi Disonuku yayi me lunga.

¹⁷¹ M-w-i-n-i yina mosi—mosi ke basikaka na este kele m-w-i-n-i yina mosi kelalaka na weste. Mpe M-w-a-n-a ya Nzambi yina mosi kwisaka na este mpe kukisiamisaka. Yandi mosi mutindi Nzambi yina me monisama na kati ya nzutu, kele M-w-a-n-a ya Nzambi yina mosi na hemisphere weste awa, yina ke kukitalisa. Yandi mosi na kati ya dibuundu na nkokila yayi, mutindu mosi mazono, bubu yayi, mpe kukonda nsuka. Nsemo ya nkokila ya Mwana me kwisa. Bubu yayi Disonuku yayi me lunga na ntwala ya beto.

¹⁷² Wapi sika beto kele na nsungi yayi ya Abraham? Wapi sika beto kele na ntangu yayi ya nene beto kele, ngunga yayi ya nene beto ke na kuzinga? Ba-vision me lunga.

¹⁷³ Yinki kutuba ntangu mulongi yayi ya ntwenia ya bankundi ya beto awa, ya dibuundu yayi kele mpangi ya beto, Junior Jackson, yina kwisaka mbangu samu na kumona beto na nkokila mosi, mu vwandaka kuna. Yandi tubaka, “Mu me lota ndosi mosi, Mpangi Branham, ya ke na kuyangisa munu. Mu me mona bampangi nionso me vukana na zulu ya mongo.” Mpe yandi tubaka, “Na zulu ya mongo yayi, nge vwandaka longa beto samu na mikanda yina ba sonikaka, ya me monana mutindu, mikanda yina ntangu sonikaka na kati ya ditadi. Ntangu nge manisaka yawu, ti nionso yina kumanaka, nge tubaka na beto, nge tubaka, ‘Beno pusana,’ mpe beto nionso kuvukanaka kuna na zulu.”

¹⁷⁴ Yandi tubaka, “Nge tandaka diboko kisika mosi mpe, ya monanaka ti, nge bakaka pied-de-biche mpe nge bulaka mpe beno zibulaka nsongi ya mwa pyramide yayi. Mpe, na ntangu ya zibukaka,” yandi tubaka, “ya vwandaka na ditadi ya granite ya kukondwa kusonika na zulu ya yawu. Mpe nge tubaka na beto na ‘kutala yawu mbote-mbote.’ Mpe beno nionso... Beto nionso bandaka na kutala.” Yandi tubaka, “Mu balulaka yintu ya munu, mpe mu monaka nge vwandaka kwenda na weste, na mbangu nionso, na kulala ya mwini.” Bantu yikwa ke bambuka moyo na yawu? [Dibuundu me tuba, “Amen.”—Mu.]

¹⁷⁵ Mpe mu telamaka kuna mwa ntangu fioti tii kuna Mpeve-Santu monisaka yawu pwelele. Mu tubaka, “Biblia ya muvimba, bima yayi nionso me monisama pwelele na muntu, na nzila ya lunungu, kusantisama, mbotika ya Mpeve-Santu, mbotika na Nkumbu ya Yesu, mpe bima yayi nionso, me monisama pwelele; kasi ya ke na binsweki yina me bumbama kuna na kati, samu

Biblia me kangama na Bidimbu Sambwadi. Mu fwana kwenda kuna samu na kumona yawu.”

¹⁷⁶ Na suka yina ntangu Bawanzio yina sambwadi kulumukaka mpe ningisaka ntoto, mpe matadi vwandaka pumbuka bisika nionso, Bawanzio sambwadi vwandaka kuna mpe tubaka, “Vutuka na Jeffersonville, na kisika yina nge me katuka, samu Bidimbu Sambwadi ya mansweki sambwadi ke zibuka.”

¹⁷⁷ Beto me kuma kisika yango, bubu yayi, beto me bakula *Nkuna ya Nioka*. Na mwa bilumbu fioti, kana Nzambi kuzola, beto ke bakula na mutindu ya kulunga *Makwela Mpe Kufwa Makwela*. Mpe bima yayi nionso yina Nzambi me zibula, Bidimbu nionso, mansweki tii na mbandukulu ya yinza. Mpe beto me sepela, samu na Mwandulu ya masakumunu ya Yandi! Ya kieleka. Bubu yayi, Disonuku yayi!

¹⁷⁸ Magazine *Life* me basisa zulunale mosi samu na yawu, “Selekele ya Nsemo ya mistiki ke na kumata na mipepe na zulu ya Tucson mpe Phoenix,” kaka mutindu mu zabisaka beno pene ya mvula mosi na ntwala yawu kusalama, mutindu ya ke vwanda, mpe mutindu triangle. Foto ke ya kunamika na yinzo-Nzambi kuna. Beno yina bakaka magazine yina beno ke na yawu. Ya vwandaka kuna, na mutindu ya kulunga. Bawu tubaka, “Ya ke na kitamina ya zulu makumi yiya na tatu mpe na yinda makumi tanu.” Ba me bakula kaka ve yina salamaka. Yawu monikaka na mutindu ya ngitukulu mpe kwendaka na mutindu ya ngitukulu.

¹⁷⁹ Mpangi Fred Sothmann, Mpangi Gene Norman na munu, vwandaka kuna. Tatu kele kimbangi. Mutindu Yandi nataka na zulu ya mongo; Pierre, Jacques, na Jean, samu na kupesa kimbangi. Beto vwandaka kuna mpe monaka yawu ntangu yawu salamaka, mpe beto monaka yawu kusalama.

¹⁸⁰ Yawu yina, ya kunamika na zulu; ntama kuna, ti ya ke na madidi ve, ya ke na mupepe ya tiya ve to kima mosi ve samu na kusala lubungi. Wapi mutindu ba lendaka vwanda kuna? Ya vwandaka Bawanzio ya Nzambi yina vwandaka vutuka, na manima ya Nsangu ya bawu. Bubu yayi profesi yina me lunga na kati ya beto. Bubu yayi Disonuku yayi me lunga.

¹⁸¹ Beno tala mbote, Bidimbu Sambwadi me zibuka. Kitembo kele na Côte Ouest. Ntangu yayi, beno kondwa yayi ve, mutindu bawu salaka na ntangu yina kuna.

¹⁸² Ntangu yayi, beto tala mbote-mbote, pene-pene fioti na kilumbu ya beto. Yinki Masonuku me tuba samu na bubu yayi, mpe samu na ntangu yina beto ke na kuzinga? Yesu ke na kutuba... Mu ke vwanda na ntangu ve ya kubaka yawu nionso, kasi mu ke zola baka yayi na ntwala beto kumanisa.

¹⁸³ Yesu tubaka, na Santu Luc kapu 17, nzila ya 30. Yesu Klisto Yandi mosi, Ndinga! Beno me kwikila yawu? [Dibuundu me tuba, “Amen.”—Mu.] Yesu Klisto, Yandi mosi, Ndinga me kuma

muntu, me tuba mpe tubaka yina Ndinga ke vwanda na ntangu ya nsuka, yina ke vwanda kidimbu ya nsuka ya yinza. Yandi tubaka na bawu ti yinsi mosi ke nwanisa yinsi yankaka, kasi Yandi tubaka, “Mutindu ya vwandaka na bilumbu ya Sodome, mutindu mosi ya ke vwanda na kilumbu yina Mwana ya muntu ke monisama pwelele.”

¹⁸⁴ Ntangu yayi, ntangu Yesu kwisaka na ntoto, Yandi kwisaka na bankumbu tatu ya Bana. Mwana ya muntu, yina kele profete; Mwana ya Nzambi; mpe Mwana ya David.

¹⁸⁵ Ntangu yayi, Yandi zingaka awa na zulu ya ntoto. Yandi tubaka ata fioti ve ti Yandi vwandaka Mwana ya Nzambi. Yandi tubaka, “Mu kele Mwana ya muntu.” Yehowa Yandi mosi bokilaka Ezéchiel mpe ba-profete, “Mwana ya muntu.” Samu, Yandi kwisaka samu na kulungisa Disonuku mutindu profete. Moise tubaka, “Mfumu Nzambi ya beno ke basisila beno Profete mutindu munu.” Yawu yina Yandi lendaka ve kuvwanda Mwana ya Nzambi kuna, samu Yandi vwandaka Mwana ya muntu. Yandi . . . “Ndinga kwisaka na ba-profete.” Mpe Yandi vwandaka Ndinga na muvimba ya Yawu. Mwana ya muntu, profete ya nene . . . Profete ya nene ve, kasi Nzambi-Profete, “Muvimba ya Bunzambi vwandaka na kati ya nzutu ya Yandi.” Na yina, Yandi vwandaka Mwana ya muntu.

¹⁸⁶ Ntangu yayi, na bamvula mafunda zole, Yandi me monisama na beto mutindu Mwana ya Nzambi, Mpeve.

¹⁸⁷ Mpe na Millenium, Yandi ke vwanda Mwana ya David, na zulu ya Kiti ya kimfumu. Beto nionso me zaba yawu, beto yina ke kwikilaka Masonuku.

¹⁸⁸ Ntangu yayi, Yesu tubaka, kaka na nsuka ya nsungi ya dibuundu yayi beto ke na kuzinga, ti, “Mwana ya muntu ke monisama diaka pwelele mutindu yawu salamaka, mutindu ya vwandaka na Sodome.”

¹⁸⁹ Beno tala wapi mutindu, landila masolo, Yandi pesaka yawu. Yandi tubaka, “Mutindu ya vwandaka na bilumbu,” ntete, “ya Noé, mutindu ba vwandaka kudia, kunwa, ke kwelana, ke kwedisa.” Na manima Yandi kwisaka, na manima, na nsuka, na Mwana ya muntu, na Sodome. Samu, kuna Yandi vwandaka sala na ba-Juifs; awa, na Sodome, Yandi ke na kusala na Bantu ya makanda. Kuna, Yandi kufwaka bawu nionso na masa, na lusambusu; awa, Bantu ya makanda, Yandi yokaka bawu nionso na kilumbu ya Sodome. Ya kieleka. Yinza ya Bantu ya makanda yokamaka na tiya kuna, “mpe ya ke vwanda mutindu yina ntangu Mwana ya muntu ke monisama pwelele.” Ya ke vwanda diaka masa ve, kasi ya ke vwanda tiya na ntangu yayi. Yesu tangaka na Genèse 23 yayi beto me tanga, ntangu Yandi tangaka yawu samu na Sodome.

¹⁹⁰ Ntangu yayi, beto ke ndima diambu yina ba ke tubila, mutindu ya yinza ya Sodome, bantu ya Sodome, mutindu ya

Sodome. Beto, beto nionso, ke tuba “amen” na yawu. Beto ke kwikila yawu. Mbote mingi.

¹⁹¹ Mpe mutindu ya kimpeve ya Laodicée, dibuundu ya kimuntu ke tuba “amen” na yawu, mpe ke ndima bidimbu ya bawu. Beto zaba ti bidimbu nionso kele kuna. Dibuundu kele na Laodicée. Beto zaba yawu. [Dibuundu me tuba, “Amen.”—Mu.]

¹⁹² Beto zaba ti yinza kele na mutindu ya Sodome. Ya kieleka? [Dibuundu me tuba, “Amen.”—Mu.] Beto ke ndima yawu.

¹⁹³ Kasi yinki kutuba samu na kidimbu ya Abraham, yina ke na kuvingga mwana ya nsilulu? Yayi vwandaka yina yankaka.

¹⁹⁴ Beno bambuka moyo, ba vwandaka na Sodome kuna; ba vwandaka na munati nsangu ya bawu. Mpe Abraham vwandaka na Munati nsangu ya yandi.

¹⁹⁵ Abraham vwandaka vingila, kilumbu na manima kilumbu, yina, kima yina zolaka salama ve. “Sarah, vwandaka na bamvula makumi yivwa, mpe yandi na bamvula nkama mosi.” Landila nsilulu ya Nzambi, yandi vwandaka vingila kaka. Na kati ya masuwula nionso, yandi vwandaka vingila mwana yina.

¹⁹⁶ Mukwikidi ya kieleka mpe ke vingila kaka kuvutuka ya Mwana yina ya nsilulu! Beno tala, kaka na ntwala mwana kukwisa, ba pesaka yandi kidimbu mosi. Kidimbu ya nkwizulu ya Mwana ke monisama pwelele ve na Nkuna ya Kimfumu ya Abraham yina ke na kuvingga Mwana ya Kimfumu, mutindu ya vwandaka na tata Abraham samu na mwana ya kimuntu? [Dibuundu me tuba, “Amen.”—Mu.] Ya kieleka? [“Amen.”] Yesu tubaka mutindu yina, awa na Santu Luc 17:30, “Na ntwala ntangu yayi kukwisa, ti, Mwana ya muntu ke monisama pwelele mutindu Yandi salaka na bilumbu ya Sodome, na ntwala ya kubeba ya Sodome.” Ntangu beto ke sosa kidimbu mosi.

¹⁹⁷ Ntangu yayi beto baka mutindu ya ntangu yina mutindu ya vwandaka na Sodome. Beno tala, bawu nionso kotaka na mambu ya Sodome, yinza.

¹⁹⁸ Mu banza ti mosi bantu ke salaka cinema salaka film mosi, ntama mingi ve, mpe mu kuzwaka ntangu ya kutala yawu, ya vwandaka, *Sodome*. Kana beno me monaka yawu ntete ve mpe ba me talisa kima yankaka ve kasi yawu, beno kwenda tala yawu. Ya ke kifwanusu ya kieleka ya Etats-Unis ya bubu yayi, Hollywood, kaka mutindu mosi; mvwatu ya mutindu mosi mpe bima yankaka nionso ba vwandaka sala na ntangu yina; balukutakanu ya nene ya kulawuka malafu mpe bima yankaka nionso, mwa lusambu mosi ya basambidi, yina ba me bokila ti ya basambidi.

¹⁹⁹ Beno tala, mpe Sodome vwanda na mbangi mosi, mpe ya vwandaka muntu na nkumbu ya Lot, yina vwandaka kaka mwana mpangi ya—ya Abraham.

²⁰⁰ Ntangu yayi, Abraham kwendaka na Sodome ve, yandi na kimvuka ya yandi. Yandi vwandaka na kimvuka ya nene, ba vwandaka mingi samu na kununga bantinu kumi na zole na makesa ya bawu. Na yawu, yandi vwandaka na kimvuka ya nene. Mpe yandi vwandaka kuna na nsi ya yinti ya chêne, kilumbu mosi, ntangu bima nionso vwandaka tambula mbote ve samu na yandi; muntu mosi ve vwandaka na kima kusala na yandi, kasi yandi kangamaka kaka na nsilulu yina.

Beno tala ntangu yayi, na bukebi nionso, na ntwala beto ke manisa.

²⁰¹ Na ntangu yandi vwandaka ya kuvwanda kuna, bantu tatu kwisaka, na ntwala ya yandi. Zole na kati ya bawu kulumukaka na Sodome mpe longaka bawu Nsangu ya mbote, samu na kubasika kuna, na Lot. Ya kieleka? [Dibuundu me tuba, “Amen.”—Mu.] Kasi Mosi bikalaka na Abraham. Beno tala, Mosi yina bikalaka na Abraham vwandaka Nzambi Yandi mosi. Zole yina yankaka vwandaka Bawanzio minati nsangu.

²⁰² Ntangu yayi, kuna na Sodome, bawu salaka bimangu ve, kaka bawu kufwaka meso ya bawu. Mpe kulonga ya Nsangu ya mbote ke kufwaka bawu meso ntangu nionso.

²⁰³ Ntangu yayi beno tala mutindu ya kilumbu yina. Ya ke na dibuundu ya kimuntu. Ya ke vwandaka ntangu nionso na tatu, mutindu mu tubaka mazono na nkokila, ti Nzambi me talisama. Ya vwandaka na ba-Sodomite; ba-Lotiste; na ba-Abrahamite. Ya ke mutindu mosi na nkokila yayi, yinza kele kaka mutindu yina.

²⁰⁴ Beno bika mu yufula beno kima mosi. Beno tala mutindu yayi kele ntangu yayi. Abraham bokilaka Muntu yayi yina solulaka na yandi, “Elohim.” Mpova yayi ya Hebreux *Elohim* zola kutuba “Yina me lunga na nionso, Yina kele ya Kukonda nsuka,” Elohim, Nzambi Yandi mosi!

²⁰⁵ Na mbandukulu ya Genèse 1, ya me tuba, “Na mbandukulu Nzambi...” Beno baka mpova ya Hebreux kuna, to, to mpova ya Grecque, mu zola tuba, “Na mbandukulu *Elohim* salaka zulu na ntoto.”

²⁰⁶ Awa, Yandi, na Genèse, kuna na kapu 22, Yandi me tuba diaka, to—to kuna na kapu 20, Yandi me tuba, mpe yandi bokilaka Muntu yayi na nkumbu ya “Elohim.” Samu na yinki yandi salaka yawu? Nzambi, talisamaka na kati ya nzutu ya muntu, yina vwandaka na Abraham mpe Yandi kudiaka mukati na mwana ya ngombe, yina kunwaka miliki, mpe yina kudiaka mampa. Nzambi Yandi mosi, mpe zimbanaka kaka kuna na ntwala ya Abraham.

²⁰⁷ Kasi Yandi pesaka yandi kidimbu mosi. Beno tala. Mpe kidimbu yina vwandaka ti Yandi balulaka mukongo ya Yandi na tenta.

²⁰⁸ Mpe beno bambuka moyo, Abraham, nkumbu ya yandi vwandaka *Abram* mwa bilumbu fioti na ntwala ya yina, mpe Sarah vwandaka *Sarai* na ntwala ya yina; S-a-r-a-ï na manima S-a-r-a-h, mpe A-b-r-a-m na A-b-r-a-h-a-m. *Abraham* zola kutuba “tata ya makanda.”

²⁰⁹ Ntangu yayi beno tala na bukebi nionso awa, mpe beto ke mona wapi sika kele ntangu yina beto ke na kuzinga ntangu yayi, samu Yesu tubaka na beto na kuvingila samu na kumona kisika yayi. Beto me mona ti yankaka nionso me fwanana mbote; ntangu yayi beto tala Nkuna ya kimfumu, yinki kisika bawu fwana kumona.

²¹⁰ Ntangu yayi Muntu yayi tubaka, “Abraham, wapi kento ya nge, Sarah?”

Mpe Abraham tubaka, “Yandi kele na kati ya tenta, na manima ya Nge.”

²¹¹ Ntangu yayi, Yandi vwandaka me monaka yandi ata fioti ve. Wapi mutindu Yandi zabaka ti nkumbu ya yandi vwandaka *Abraham*? Wapi mutindu Yandi zabaka ti nkumbu ya yandi vwandaka S-a-r-a-h? “Abraham, wapi kento ya nge Sarah?”

Yandi tubaka, “Yandi kele na kati ya tenta, na manima ya Nge.”

²¹² Yandi tubaka, “Munu . . .” “Munu,” kiyingilu kimuntu. “Mu ke kwisa kutala nge landila nsilulu. Kento ya nge ke kuzwa bébé. Nge me tula kivuvu na Munu, ntangu yayi Mu ke sala ti yawu kusalama.”

²¹³ Mpe Sarah, na kati ya tenta, na manima, vwandaka kuwa ya kubumbama to tulaka dikutu, nionso yina beno ke bokila yawu, yandi vwandaka kuwa na kati ya tenta, yandi sekaka na nsi ya mapeka, mpe yandi tubaka, “Ntangu yayi, munu, kiboba ya kento mutindu yayi, kuvwanda na nsatu ya mfumu ya munu; mpe yandi kiboba, diaka, yandi ke na bamvula nkama mosi? Na ntangu, bamvula mingi, mingi me luta yawu me salama ve.”

²¹⁴ Mpe Muntu yango, M-u-n-t-u, yina vwandaka kuna ke kudia, na nzutu ya muntu, ke kunwa mpe ke kudia mutindu muntu nionso; na putulu na bilele ya Yandi, mpe vwandaka na putulu na makulu ya Yandi, mpe Abraham sukulaka yawu. Nzambi, Yandi mosi, talaka pene-pene, mpe Yandi tubaka, “Samu na yinki Sarah me seka, kuna na kati ya tenta, ya me seka mutindu *yayi*?” Yandi zabaka, Yandi lendaka swasikisa mabanza ya Sarah na kati ya tenta, na manima ya Yandi. Ya kele kieleka? [Dibuundi me tuba, “Amen.”—Mu.]

²¹⁵ Ntangu yayi, ntangu Nkuna ya Kimfumu ya Abraham kwisaka na zulu ya ntoto, yinki kidimbu Yandi talisaka, Mwana ya muntu. Simon kwisaka na Yandi kilumbu mosi; André nataka yandi. Yandi tubaka, “Nkumbu ya nge kele Simon. Nge kele

mwana ya Jonas,” Yandi tubaka. Beno me mona, yina ke basisa mukwikidi na nganda ya yandi.

²¹⁶ Philippe kwendaka kuna mpe yandi kwendaka baka Nathanaël; yandi kwisaka vutuka, yandi tubaka na yandi, “Kwisa, tala Muntu Yina beto me—beto me mona; Yesu ya Nazareth, mwana ya Joseph.”

²¹⁷ Yandi tubaka, “Ntangu yayi vingila fioti. Kima ya mbote lendaka basika na bufanatiki yina?”

Yandi tubaka, “Kwisa, nge mona.”

²¹⁸ Na yawu ntangu Philippe kwisaka na Ntwala ya Yesu, na Nathanaël, Yesu talaka yandi mpe tubaka, “Beno tala Israelite yina ata diambu ya luvunu kele na yandi ve.”

Yandi tubaka, “Rabbi, yinki ntangu Nge me zaba munu?”

²¹⁹ Yandi tubaka, “Na ntwala Philippe kubokila nge, ntangu nge vwandaka na nsi ya yinti, mu monaka nge.”

²²⁰ Yandi tubaka, “Rabbi, Nge kele Mwana ya Nzambi. Nge kele Ntinu ya Israel!”

²²¹ Ntangu kento yina ya leke na dibulu ya masa, na mutindu ya yandi ya mansoni, kwisaka, mwa kifwanusu mosi ya kufwanana na yayi, samu na kubaka masa. Yesu fidisaka bilandi ya Yandi, samu na kusumba madia. Ntangu yandi kwisaka kuna samu na kubaka masa, Yandi tubaka, “Natila Munu masa ya kunwa, kento.”

²²² Yandi tubaka, “Ya ke kikalulu samu na Beno na kutuba mutindu yayi. Beto kele ya kukabwana awa. Ntangu yayi, beno ba-Juif beno ke na kima ya kusala ve na ba-Samaritain; beto ke na kima ya kusala ve na beno.”

²²³ Yandi tubaka, “Kasi, kento, kana nge zabaka na Nani nge ke tuba, nge zolaka lomba Munu masa ya kunwa. Mu ke pesa nge bamasa yina nge ke kwisaka kubaka awa ve.”

²²⁴ Yandi monaka mutindu yandi vwandaka, yina vwandaka. Yandi tubaka, “Kwenda sosa bakala ya nge mpe beno kwisa awa.”

Yandi tubaka, “Mu ke na bakala ve.”

²²⁵ Yandi tubaka, “Nge me tuba kieleka. Nge vwandaka na bawu tanu, mpe yina nge ke zinga na yandi ntangu yayi kele ya nge ve.”

²²⁶ Yandi tubaka, “Tata, mu me mona ti Nge kele profete. Beto me zaba ti ntangu Mesiya ke kwisa Yandi ke talisa beto mambu yayi.”

Yesu tubaka, “Mu kele Yandi.”

²²⁷ Na yina, yandi kwendaka mbangu na kati ya mbanza mpe tubaka, “Beno kwisa tala, Bakala Yina me tuba na munu mambu yina Mu salaka. Yayi kele Mesiya ve?”

²²⁸ Beno tala, Yandi salaka yawu na ntwala ya ba-Juif, mpe ba-Samaritain, kasi ata fioti ve na Bantu ya makanda. Bantu ya makanda, ya kele beto, na ntangu yina beto vwandaka mimpani, bayinsi yankaka, beto vwandaka tambula na mwa kitini ya yinti na mukongo, na kusambilaka biteki. Beto vwandaka vingila Mesiya ve.

²²⁹ Yandi ke monikaka na bayina ke sosaka Yandi, mpe beto lendaka vwanda bayina ke na kuvingila Yandi.

²³⁰ Kasi bayina zonzaka ti ba vwandaka vingila Yandi, dibuundi yawu mosi, ntangu bawu monaka yina kusalama, bawu tubaka, "Yandi kele diabulu. Yandi kele nganga-nkisi, Béelzébul!"

²³¹ Mpe Yesu tubaka, "Bantu ke kuzwa mulemvo na konso disumu yina bawu ke sala," samu Yandi vwandaka me kufwa ntete ve. "Kasi," Yandi tubaka, "kilumbu mosi ntangu Mpeve-Santu ke kwisa mpe ke sala kima ya mutindu mosi, mpe kutuba kaka mpova mosi samu na kutelemina yawu beno ke kuzwa ve mulemvo ata fioti ve." Ya kele bubu yayi, wapi sika bitini nionso ya Ndinga ke vukana kintwadi. "Kutuba mpova mosi samu na kutelemina Yawu; beno ke kuzwa mulemvo ata fioti ve na yinza yayi to na yinza ke kwisa."

²³² Yina vwandaka Nkuna ya Abraham. Mpe awa Nkuna yina ya Kimfumu ya Abraham, yina kwisaka samu na kutasalama yina ya Muntu yina vwandaka kuna na Abraham, kwisaka samu na kusiamisa ti ya vwandaka Nzambi yina mosi, mpe silaka na kilumbu yayi, "Mutindu ya vwandaka na bilumbu ya Sodome, mutindu yina ya ke vwanda na nkumulu ya Mwana ya muntu, ntangu Yandi ke kukimonisa Yandi mosi pweelele mutindu Mwana ya muntu." Amen. Ya ke ntangu yayi kilumbu yina Disonuku yayi ke lungisama.

²³³ Beno tala kisika beto kele bubu yayi. Beno tala dibuundi kisika Mwana ya Nzambi... Beno tala kilumbu yayi ya mudidi. Beno tala baprofesi nionso. Ntangu yayi, kima ya ngitukulu, banzenza ya beto zolaka vwanda kuna, kana kisika yango fwana vwanda mutindu na Sodome.

²³⁴ Ba vwandaka tatu yina kwisaka, bantu tatu ya kulutila mbote yina ba fidisaka na Zulu. Beto ke ndima yawu. Bawu vwandaka tatu; Mosi bikalaka na Abraham. Bawu nionso bandaka kuna, kasi Mosi bikalaka na Abraham. Bayina yankaka kwendaka kuna na Sodome. Ya kieleka? [Dibuundi me tuba, "Amen."—Mu.] Mpe Abraham nkumbu ya yandi ba sobaka yawu, katuka na Abram na Abraham. Ya kieleka? ["Amen."]

²³⁵ Ya ke na ntangu mosi ve na masolo, dibuundi ya yinza, me vwandaka ntete na evangéliste yina me kwisaka na yandi, na nkumbu yina me suka na h-a-m, tii bubu yayi, Billy G-r-a-h-a-m. Ya kieleka? [Dibuundi me tuba, "Amen."—Mu.] G-r-a-h-a-m, bisono sambanu. A-b-r-a-h-a-m kele na bisono sambwadi.

Kasi G-r-a-h-a-m kele na bisono sambanu, ya zola kutuba yinza, muntu. Beno me mona?

²³⁶ Beno tala bayina kwendaka kuna, bubu yayi, ba ke minati nsangu ya Zulu.

²³⁷ Ya ke na muntu mosi na zulu ya ntoto yina me longaka kubalula ntima na mutindu ya pwelele mutindu Billy Graham? Ya me vwandaka ntete na muntu yina me salaka kisalu na zulu ya bantu, mutindu Billy Graham? Ya me vwandaka ata fioti ve, na yinza ya muvimba, na muntu mosi. Oh, Billy Sunday, mpe bayankaka, vwandaka awa na Etats-Unis, kasi Billy Graham me zabana na yinza ya muvimba. Beno me mona kisika yandi ke na kubokila? Na Sodome.

²³⁸ Mpe yandi ke na yina ke na kukwenda nzila mosi na yandi kuna na dibuundu ya Pentecote, Oral Robets mosi.

²³⁹ Kasi yinki samu na kimvuka yina ba me Soolaka? Wapi mutindu ya kidimbu bawu lendaka kumona? Yinki bawu lendaka kuzwa? Alleluia! “Ya ke vanda Nsemo na ntangu ya nkokila.” Bubu yayi Disonuku yayi me lunga. [Dibuundu ke na kusepela—Mu.] Bubu yayi nsilulu ya Nzambi me lunga. Beto zaba ti ya kele Kieleka. Yandi kele awa na nkokila yayi mutindu Yandi vwandaka na ntangu yina kuna.

²⁴⁰ Ntangu yayi, kulonga yawu, mutindu mu me tuba yawu na mwa ntangu fioti me luta, kana beno longa kima mosi mpe ya kele Kieleka ya Nsangu ya mbote, na yina Nzambi me tindama na ngolo na kusiamisa yawu. Ya kieleka? [Dibuundu me tuba, “Amen.”—Mu.] Ntangu yayi, kana ya ke mutindu yina, bika ti Nzambi yina sonikaka Ndinga, bika ti Nzambi yina pesaka profesi, bika ti Nzambi yina kele Nzambi ya Ndinga, kukwisa mpe kusiamisa ti Yandi kele kaka Nzambi.

²⁴¹ Mutindu Elie mataka na zulu ya mongo; yandi vwandaka tala, Elisée mataka yandi vwandaka tala Elie, yandi tubaka, “Mu ke zola bitini zole.” Mpe kazaka yina vwandaka na zulu ya Elie kubwaka na zulu ya Elisée. Yandi kwendaka kuna, mpe yandi bukaka kazaka mbala zole mpe bulaka nzadi, mpe yandi tubaka, “Wapi kele Nzambi ya Elie?” Mpe kima yina mosi salamaka samu na Elie, yawu salamaka samu na Elisée.

²⁴² Mpe Nsangu ya mbote mosi, Ngolo mosi, Mwana ya muntu mosi yina vwandaka mazono, kele bubu yayi, mpe ke vwindaka kukonda nsuka. Hebreux 13:8. Beno ke kwikila Yawu? [Dibuundu me tuba, “Amen.”—Mu.] Na yina, mu ke yufula beno. Mu lenda vwindaka Yandi ve, kasi Yandi kele awa. [“Amen.”] Beto kele kaka mungamba.

²⁴³ Bayankaka na kati ya beno kuna, yina kele na kimbevo mpe na mpasi, mpe beno zaba ti mu me zaba beno ve, bika Nzambi ntangu yayi... kana mu lenda kukikulumusa mingi munu mosi. Beno sambila mpe beno lomba na Nzambi.

²⁴⁴ Mu banza ve... Ya ke na kalati ya bisambu na kati ya kivinga, ya kele? Ve, mu zola ve... Beto kabulaka ata kalati mosi ve ya bisambu. Beto ke vwanda na lukutakanu ya bisambu na... to kubeluka ya bambevo, na dibuundu. Kasi, beno sambila.

²⁴⁵ Mpe beno zaba ti mu kele kieleka nzenza samu na beno. Beno me mona, beno me zaba munu, beno bantu ya Jeffersonville! Mu zola ve ti ya vwanda bantu ya Jeffersonville kusala yawu. Mu zola ti ya vwanda bantu yina me katuka bisika yankaka. Beno tala kana Nzambi ke monisa kaka pwelele! Beno tala kana Yandi kele kaka mutindu mosi mazono, bubu yayi, mpe kukonda nsuka!

²⁴⁶ Beno sala mutindu kento yina ya fioti salaka. Yandi vwandaka luta, mpe yandi tubaka, "Mu ke kwikila Muntu yayi." Yandi vwandaka basika menga, mpe yandi tubaka, "Kana mu lenda simba nsongi ya lele ya Yandi, mu ke kwikila ti mu ke beluka." Ya kieleka?

²⁴⁷ Samu na lukwikilu ya yandi, kilumbu yina, Disonuku vwandaka me lunga. "Yandi kangaka mputa ya bantima yina ba ke niokolaka, yandi belusaka bambevo mpe bikata."

²⁴⁸ Ntangu yandi simbaka lele ya Yandi, mpe kwendaka kuna mpe vwandaka, Yandi balukaka mpe tubaka, "Nani me simba Munu?" Wapi mutindu Yandi zabaka, na kati ya nkonga ya bantu mingi yina, kieleka bambala makumi tatu bantu yina kele awa, bamafunda ya bantu? Wapi mutindu Yandi zabaka yawu? Yandi tubaka, "Nani me simba Munu?" Yandi tubaka yawu ve samu kaka na kutuba; Yandi tubaka yawu samu yawu vwandaka kieleka. Mpe Yandi tubaka, "Nani me simba Munu?" Mpe na mbala mosi Yandi talaka na nziunga mpe yandi monaka kento yina ya fioti, kisika yandi vwanda me vwanda to ya kutelama, ya vwanda konso mutindu yina yandi vwandaka, Yandi tubaka na yandi ti kubasika ya menga ya yandi me kangama.

²⁴⁹ Yina vwandaka Yesu mazono. Ya kele Yandi bubu yayi. Beno ke kwikila yawu? [Dibuundu me tuba, "Amen."—Mu.]

²⁵⁰ Mu me zaba beno ve; Nzambi me zaba beno. Kasi beno ke na bampasi na mpanzi ya beno, ya ke yangisa beno. Ya kieleka. Beno me vwanda kuna ke sambila samu na yawu. Mu kele nzenza samu na beno, mpe beto kele banzenza mosi na yankaka? Beno telama, kana ya ke mutindu yina. Mu me zaba beno ve. Muntu *yayi* awa na nsongi, bakala yayi ya ntwenia. Beno kele diaka na mpasi na laka. Ya kieleka. Beno ke na kusambilu samu na yawu. Ngé me kuma ya muvimba na kidi-kidi samu na kima mosi. Beno fwana bika lukutakanu yayi samu, beno kele longi, beno kele na mwa bizitu yina beno fwana sungimina. Ya kieleka. Uh-huh. Beno ke kwikila ti Nzambi me zaba nani beno kele? Révérend Tata Smith, ntangu yayi beno lenda kwenda mpe kubeluka. Yesu Klisto me belusa beno. Beno kwenda na lukutakanu ya beno; laka ya beno ke yangisa beno diaka ve.

Nani yandi me simba?

²⁵¹ Ya ke na muntu mosi me vwanda na manima *awa*; yandi ke na kumona mpasi. Yandi ke na tumeur na poumon ya yandi ya kimama. Yandi kele ve . . . Yandi kele ya awa ve. Nge vwandaka sala na mine. Ya kieleka. Mu kele nzenza ya kulutila samu na beno. Kana ya kieleka, beno ningisa diboko ya beno. Tumeur kele na poumon ya beno ya kimama, mpe ba ke sala beno lipaso na bilumbu ke kwisa. Ya kieleka? Beno kele ya awa ve. Beno me katuka na nganda ya mbanza. Beno me katuka na Virginie. Ya kieleka. Beno ke kwikila ti Nzambi me zaba nani beno kele? Tata Mitchell, ya kieleka, vutuka na yinzo mpe vwanda na mavimpi ya mbote. Yesu Klisto me belusa beno. Beno yufula muntu yayi! Mu me monaka yandi ata fioti ve, na luzingu ya munu. Yandi vwandaka kuna, ke sambilia.

Bubu yayi Disonuku yayi!

²⁵² [Mpangi Branham me balula mukongo na dibuundu—Mu.] Mama yayi me vwanda awa, na manima ya munu, mutindu Sarah vwandaka na kati ya tenta. Yandi vwandaka sambila samu na mwana ya yandi ya kento. Telama. Mwana ya yandi kento kele awa ve; yandi kele ntama, mwana ya yandi ya kento. Mpe beno kele na diambu ya mutindu mosi mutindu ya vwandaka ntangu kento yina kwisaka na Yesu, samu kento yango yangisamaka mingi na mpeve ya yimbi. Kento yango kele . . . kento yayi ya ntwenia kele na mpeve ya yimbi. Yandi kele awa ve. Yandi me katuka na . . . Beno me katuka na Caroline du Nord. Beno me kwikila yawu? Mpe ya kele kieleka, mutindu yina ve? Mama Orders, nge lenda vutuka na yinzo. Kana nge me kwikila na ntima ya nge ya muvimba, nge ke kuzwa mwana ya nge ya kento mutindu ntangu Yesu Klisto na bilumbu yina me luta, tubaka ti yandi me beluka.

²⁵³ Bubu yayi Disonuku yayi; kidimbu ya Sodome, kidimbu ya Nkuna ya mazulu, kidimbu ya dibuundu ya kimuntu! Bubu yayi Disonuku yayi me lunga na kati ya beno. Beno me kwikila yawu? [Dibuundu me tuba, “Amen.”—Mu.]

²⁵⁴ Beno ke kwikila Yandi na ntangu yayi mutindu Mvulusi mpe munganga ya beno? Beno telama, beno nionso, beno tuba, “Mu me ndima kubeluka ya nzutu ya munu. Mu me ndima Yandi mutindu Mvulusi ya munu. Mu me ndima Yandi mutindu Ntinu ya munu.” Beno telama beno nionso.

Bubu yayi! Beno kuwa, bankundi ya munu.

²⁵⁵ “Yandi tangaka Disonuku, vutulaka Biblia na nganga Nzambi, mpe,” tubaka, “bantu nionso vwandaka kutala Yandi. Mpe Yandi talaka bawu, mpe tubaka, ‘Bubu yayi Disonuku yayi me lunga.’”

²⁵⁶ Mu me tanga Masonuku na banzikisa makumi zole to kulutila ti beto ke na kuzinga na kilumbu ya nsuka, nsungi ya bantu yina ke mona Yesu Klisto ke vutuka na ntoto. Mpe mu ke

tuba na beno na nkokila yayi, diaka, bubu yayi Disonuku yayi me lunga na ntwala ya beno.

²⁵⁷ Beno yina kele na Tucson, beno yina kele na Californie, beno yina kele na New York, bayina ke na kulanda na bansinga ya allo-allo, bubu yayi Disonuku yayi me lunga na ntawala ya beno.

²⁵⁸ Beto yangalala mpe beto vwanda na kiese, samu ntangu ya Makwela ya Mwana-dimeme me lunga, mpe Kento ya Yandi... Kento ya Yandi me kubama Yandi mosi.

²⁵⁹ Beto telemisa maboko ya beto mpe beto pesa Yandi nkembo, beno bantu nionso. Nzambi kusakumuna beno. [Dibuundu ke na kusepela kaka mpe ke na kukumisa Nzambi—Mu.] 

65-0219 Bubu Yayı Disonuku Yayı Me Lunga
Lukolo Parkview Junior High School
Jeffersonville, Indiana U.S.A.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org